

中國方志叢書·華北地方·第五六三號


據

清乾隆二十九年刊本
清乾隆二十九年刊本
費廷珍纂修

影印

甘肅省

直隸秦州新志



561/04

成文出版社有限公司印行



10107831

中華民國六十五年 月壹一版

直隸秦州新志

全六冊

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

直隸秦州新志卷之十二 中

雜記

羗戎

西羗本出三苗姜姓之別也其國近南岳舜徙之三危夏后相征畎夷七年然後來賓后桀之亂畎夷入居邠岐之間成湯伐而攘之武丁又伐之武乙暴虐犬戎寇邊周古公踰梁山而避于岐下及子季歷遂伐西落鬼戎復伐燕京之戎及余無始呼騫徒之戎皆克之文王率西戎征殷之叛國以事紂武王伐商

堯鬻與師至穆王西征遂遷戎於太原夷王命虢公
伐太原之戎厲王時戎入犬邱殺秦仲之族宣王立
召秦仲子莊公代戎破之王又伐太原戎條戎奔戎
不克後晉人敗北戎於汾濕戎滅姜侯之邑王征申
戎破之幽王命伯士伐六濟之戎其年戎圍犬邱虜
秦襄公之兄伯父王爲無道戎與申侯殺之驪山下
周乃東遷秦襄公攻戎救周邢侯又大破北戎及平
王之末戎逼諸夏自隴山以東徃往有戎於是渭首
有狄獯却冀之戎有義渠大荔之戎春秋魯莊公伐

秦取邽冀之戎厥後陸渾戎自瓜州遷于伊川允姓
戎遷于渭汭貞王八年秦厲公滅大荔趙滅北戎韓
魏共滅伊洛之戎其遺脫者皆逃走西踰汧隴自是
中國無戎寇唯餘義渠焉秦伐義渠虜其王後數叛
服至周末秦昭王滅義渠始置隴西北地上郡焉
羌無弋爰劍者不知何戎之別秦厲公時爲秦所拘
執以爲奴隸羌人謂奴爲無弋故因名之其後得逃
歸世世爲豪至曾孫忍時秦獻公兵臨渭首滅狄獯
戎忍季父卬畏秦遠徙各自爲種有氐牛種越嶲羌

是也白馬種卽廣漢羌參狼種武都羌也忍及弟舞
留湟中忍生九子爲九種舞十七子十七種忍子研
至豪健是爲研種漢景帝時研種留何率種人求守
隴西塞於是徙留何等於狄道安故至臨洮氏道羌
道縣羌道今禮縣至研十三世孫燒當立元帝時多
時並屬隴西

姐等七種羌寇隴西馬奉世討降之少姐降後數十
年邊塞無事燒當豪健其子孫更以爲種號

滇良者燒當之元孫也更始時寇隴西隗囂不能討
建武十年先零豪與諸種復寇隴西來欵擊之大破

明年又寇隴西馬援破降之徙置天水隴西等三郡
參狼隨反援又破降之中元元年參狼反隴西太守
劉盱遣將與武都兵破之二年滇吾寇隴西劉盱不
能克遣謁者張鴻領諸郡兵與戰于允吾唐谷軍敗
鴻及隴西長史田颯皆沒又天水兵爲牢姐種所敗
於白石死者千餘人永平元年竇固馬武等擊滇吾
於西邯大破之護羌校尉竇林爲諸羌所信滇吾弟
滇岸詣林降林表爲大都尉明年滇吾降林復奏其
第一豪帝疑一種兩豪以詰林林辭寔乃僞對曰滇

岸卽滇吾隴西語不正耳帝窮驗知之怒而免林官
謁者郭襄代領校尉事到隴西聞涼州羌盛還詣闕
抵罪於是省校尉官建初元年滇吾子迷吾與諸種
爲寇隴西太守孫純遣從事李睦擊之稍却拜吳棠
領校尉不能制坐徵免傅育代之迷吾寇隴西漢陽
於是遣車騎將軍馬防長水校尉耿恭討之至元和
三年迷吾復與弟號吾入寇隴西界郡督烽掾李章
追之生得號吾將詣郡號吾曰誠得生歸不復犯塞
隴西太守張紆權宜放遣羌卽散歸傅育不欲失信

乃募人鬪諸羌胡羌胡不肯復叛出塞更依迷吾章
和元年育請發隴西等郡兵自領漢陽金城五千人
合二萬與諸郡剋期擊之合隴西兵據河南未及會
育軍獨進爲迷吾所襲死之下詔褒美侯其子以太
守張紆代爲校尉紆誘殺迷吾等五人頭以祭育冢
迷吾子逃唐與諸種解仇交質寇隴西塞太守寇盱
拒却之張紆不能討永元元年坐徵以鄧訓代稍以
賞賂離間之由是諸種稍解永元四年朔卒聶尚伐
徵以文德服之不效五年徵免貴友至道譯使構

諸種誘以財貨由是解散出兵擊之迷唐遠遁八年
友卒漢陽太守史充代明年徵吳祉代其秋迷唐入
寇擊破隴西兵征西將軍劉尚越騎校尉趙代遣司
馬寇盱擊之出塞明年尚代坐畏懦徵迷唐降復叛
十二年以周鮪代吳祉其秋鮪與侯霸領諸郡兵及
隴西牢姐羌等出塞與迷唐戰降者六千餘口分徙
漢陽隴西安定迷唐遂弱明年侯霸代鮪置東西部
屯田五部金城西部都尉曹鳳屯田二十七部其功
垂立至永初中迷唐失衆病死一子來降

安帝永初元年遣騎都尉王弘發隴西漢陽等郡
征西域羣羌驚懼於是大爲寇掠斷隴道遣鄧騭任
尙屯漢陽明年春擊敗騭軍侯霸免段禧代其冬騭
使任尙及從事中郎司馬鈞與戰于平襄尙軍敗於
是滇零等遂大盛寇鈔三輔斷隴道朝廷不能制而
轉運難劇遂詔騭還畱任尙屯漢陽爲諸軍節度四
年詔任尙還屯長安段禧卒復以侯霸代移居張掖
五年移隴西徙襄武六年侯霸擊之有功元初元年
羌號多還斷隴道涼州刺史皮楊擊羌於狄道大敗

徵免侯霸卒漢陽太守龐參代以恩信招之號多降
二年參將羌胡兵擊零昌至勇上東爲所敗六期抵
罪馬賢代六年春勃姐等反賢擊之於安故皆降延
光元年賢追麻奴出塞種衆散遁詣涼州刺史宗漢
降冬將種衆三千餘人詣漢陽太守耿种降顯帝永
建元年隴西鍾羗反賢擊降之封賢都鄉侯自是涼
州無事四年令隴西等郡常儲穀粟其冬賢坐徵免
韓皓代皓徵馬續代陽嘉三年鍾羗良封等復寇隴
西漢陽拜馬賢爲謁者鎮撫諸種四年賢發隴西吏

士及羌胡兵擊殺良封永和元年馬續遷復以賢代
二年賢又擊破白馬隴西復平四年徵賢爲弘農太
守以劉秉爲涼州刺史天性虐刻多所擾發羌等復
叛秉坐徵拜馬賢征西將軍屯漢陽又於漢陽隴道
作塢壁三百所置屯兵以保聚百姓且凍種燒隴關
掠苑馬六年賢擊之到射姑山軍敗賢及二子皆戰
沒帝愍之封其孫光舞陽亭侯於是東西羌遂大合
寇西漢安元年以趙冲爲護羌校尉惟燒何種未
平三年夏冲與漢陽太守張貢掩擊連破之詣涼州

降建康元年襲羌從事馬立將羌衆亡出塞校尉衛
瑤追斬立等赴冲復追殺羌戰歿永嘉元年封冲子
愷義陽亭侯以漢陽太守張貢代左馮翊梁並招其
五萬餘戶降隴右復平永壽元年貢卒第五訪代甚
有威惠西垂無事延熹二年卒段熲代時燒當八種
寇隴右熲大破之坐事徵以胡閼代閼無威略寇思
轉盛中郎將皇甫規擊降之五年烏吾種寇漢陽隴
西金城諸郡兵擊破之漢那復寇六年隴西太守孫
羌擊破之閼疾復以段熲爲校尉中平元年北地降

羌先零種與義從胡北宮伯玉等反殺護羌校尉冷
徵遂寇亂隴右焉

白馬氏者居於河池一名仇池仇池百頃周回九千
四十步天形四方壁立千仞自然樓櫓卻敵分置調
均竦起數丈有踰人功有二十一道可攀援而上東
西二門盤道下至上凡七里上則嶽阜低昂泉流交
漢水徑注云羊腸盤道三十六回數爲邊寇討之則
依固自守建武初氏人悉附隴蜀隗囂滅乃降漢隴
西太守馬援上復其王侯君長賜以印綬

建武初盧芳亡入匈奴數爲邊患匈奴聞漢購求盧芳貪得財帛乃遣芳還降而芳以自歸爲功單于復
恥言其計賞遂不行匈奴由是大恨入寇尤深二十
年遂至上黨扶風天水延光四年漢陽太守傅衆代
法度爲度遼將軍卒龐參代之永和元年護羌校尉
馬續爲度遼將軍撫以恩信右賢王降其秋句龍王
車紐犯邊遂寇掠幽冀并涼靈帝立幽并涼三州緣
邊諸郡無歲不被鮮卑寇抄殺掠不可勝數

以上俱見後漢

書西羌傳

河內王者其先出自鮮卑慕容氏初慕容奕洛干有
二子庶長白吐谷渾嫡曰廆洛干卒廆嗣位吐谷渾
避之西徙廆追留之而牛馬皆西走不肯還因遂西
上隴度抱罕出涼州西南至赤水而居之其地則張
掖之南隴西之西在河之南故以爲號其界東至壘
川西隣于闐北接高昌東北通秦嶺方千餘里蓋古
之流沙地焉有青海方數百里放牝馬其側輒生駒
土人謂之龍種故其國多善馬吐谷渾孫葉延頗識
書記自謂曾祖奕洛干始封昌黎公吾蓋公孫之子

也禮以王父字爲臣氏因姓吐谷渾亦爲國號至其
末孫阿豺始受中國官爵弟子慕延宋元嘉末又自
號河南王慕延死從弟拾寅立乃用書契起城池築
宮殿其小王並立宅拾寅死子度易侯立易侯死子
休留代立齊永明中以代爲護羌校尉西秦河二州
刺史梁興進代爲征西將軍代死子休運籌襲爵位
天監普通間屢遣使貢方物籌死子呵羅真立大通
三年詔以爲寧西將軍西秦河二州刺史真死子佛
輔嗣立其世子又獻白龍駒於皇太子

梁書

何奴劉淵冒頓之後真高帝以宗女妻冒頓故其後以母姓爲氏淵初仕晉後爲大單于遷於左國城自稱漢王追尊劉禪爲孝懷皇帝攻擊郡縣剋平陽蒲坂遂都平陽稱帝子聰代立遣劉曜攻陷洛陽執晉懷帝後又遣曜攻陷長安執晉愍帝聰死子粲襲位靳準篡之靳明殺準降于劉曜曜淵族子見養於淵靳明旣降遂僭尊號還都長安自稱大趙西通張駿南服仇池封其子信爲南陽王以漢陽十三郡爲國于臺於渭城石勒進據石門曜甫知之與戰師

略陽清水氏湯氏世居隴右爲豪族漢獻帝建安中
有楊騰者爲部落太帥騰子駒始徙仇池及孫千萬
爲百頃王其後飛龍受晉武爵還居略陽以令狐茂
搜爲子復保百頃愍帝爵之子難敵爲左賢王屯下
辯堅頭爲右賢王屯河池難敵卒子毅立自號下辯
公號堅頭子槃河池公咸康初稱蕃于晉毅族兄初
殺毅自立爲仇池公後臣於晉亦仍其號加封天水
公初子國桓溫表爲秦州刺史國從父俊殺國歸順
仍爲仇池公子世太和間爲秦州刺史世子纂亦爲

秦州刺史皆朝命也。咸安初，苻堅討纂，殺之，徙其民於關中空百頃之地。初，毅有小弟宋奴，生二子，名佛、奴。佛狗，逃奔關中，苻堅愛之，以女妻佛。奴子定堅，死，定還隴右，徙治歷城，置倉儲千百頃，復自號仇池公，遣使稱蕃。孝武卽以其號假之，求割天水之西縣武都之上祿爲仇池郡，許之。又以爲秦州刺史，進平天水、略陽郡，遂有秦州之地。自號西王，後攻乞伏軋，歸見殺。佛狗子盛，襲號仇池公，分諸四山，氏羌爲二十部，護軍各爲鎮戍，不置郡縣。稱蕃貢獻，屢受朝命。又有

救梁州功義熙三年假盛使持節北秦州刺史宋受
晉禪改封武都王以其子玄爲世子玄立雖爲蕃臣
猶奉義熙之號文帝以玄爲使持節北秦州刺史乃
奉元嘉正朔焉玄卒弟難當自立太祖以爲寇軍將
軍秦州刺史屢進號難當以次子順爲秦州刺史守
上邽先是四方流民有許穆之郝恢之二人投難當
並改姓司馬云是晉室近戚穆之自云名飛龍恢之
自云名康之康之等爲人所殺難當以兵力資飛龍
使入蜀爲寇時梁州刺史甄法護刑法不理太祖遣

蕭思話代之未至難當舉兵逐法護遂有漢中之地
十年正月思話至遂平梁州難當上表謝罪帝特宥
之十二年難當兄子保宗奔索虜拓跋燾以爲都督
隴西諸軍事南秦王遣襲上邽難當子順退守下辯
明年難當自立爲大秦王號年建義置百官十八年
傾國南寇規有蜀土遂剋葭萌破晉壽進圍涪城不
剋而還次年帝遣梁州刺史劉道真等率兵討之至
漢中長驅而進道真剋武興向下辯取白水所向克
捷天水任愈之率部酋歸順從裴方明破難當世子

和於修城難當乃將妻子奔虜中安西參軍魯尚期
追難當出寒峽生禽其僞官楊虎頭等送京師斬之
難當死于虜仇池平以輔國司馬胡崇之爲秦州刺
史守仇池至濁水去仇池八十里遇拓跋燾將拓跋
齊等戰敗奔還漢中前鎮東司馬苻達等舉義立保
宗弟文德爲主拓跋兵遁達追斬齊因據白崖分平
諸戍文德自號仇池公遣露板馳告朝廷詔以爲使
持節都督秦雍諸軍事北秦州刺史封武都王文德
旣受朝命從王師北討有功會南郡王義宣反文德

不同見殺追贈其官以保宗子元和爲武都王治白水不能自立復走奔索虜元和從弟僧嗣復自立詔以爲仇池太守北秦州刺史武都王僧嗣卒從弟文度復自立秦豫初以爲略陽太守進北秦州刺史王如故文度遣弟文弘伐仇池破戎兵於蘭臯順帝初以文弘爲略陽太守其年虜破茄蘆文度見殺卽以文弘爲北秦州刺史襲封武都王退治武興

以上宋書

難當族弟廣香先奔虜元徽中爲虜攻殺文慶

宋書作慶

卽以爲葭蘆鎮王朝議以文弘爲北秦州刺史高帝

卽位梁州刺史范相年被誅其親將李烏奴奔氏中
文弘納之帝以文弘背叛進廣香爲持節都督西秦
州刺史以難當正裔楊後起爲平羌校尉北秦州刺
史武都王三年文弘降復以爲征西將軍北秦州刺
史先是廣香病死氏衆半奔文弘文弘遣從子後起
進據白水後起卒詔以楊集始爲北秦州刺史武都
王後起弟後明爲白水太守永明十年集始反戰敗
奔入武興以城降虜建武二年氏虜寇漢中前氏王
楊後起弟子元秀收合義兵斷虜運道虜亦遣其僞

南梁州刺史仇池公楊靈珍據泥山以相拒元秀死
楊馥之聚義衆與集始戰集始走下辯馥之據武興
虜軍退馥之留弟昌之守武興自引兵據仇池朝廷
以馥之爲北秦州刺史仇池公隆昌四年楊靈珍歸
順攻集始於武興殺其二弟集同集衆集始窮急請
降以靈珍督隴右軍事武都王永元二年復以集始
爲北秦州刺史靈珍後爲虜所殺

以上
齊書

天監初以集始爲使持節都督秦雍諸軍事北秦州
刺史武都王集始死子紹先立紹先死子智慧嗣立

大同元年寇復漢中智慧率四千戶歸國詔卽以爲東益州其國東連秦嶺西接宕昌去宕昌八百里南去漢中四百里北去岐州三百里東去長安九百里本有十萬戶世世分滅其大姓有符氏姜氏

以上
梁書

初難當爲裴方明所敗棄仇池與千餘騎奔上邽世祖遣人迎之高宗時拜難當營州刺史還爲外都大官卒謚曰忠子和隨父歸國別賜爵仇池公子德襲難當爵早卒子小眼襲例降爲公拜天水太守卒子公熙襲爵爲假節別將與都督元志同守岐州爲秦

賊莫折天生所虜死於秦州其後別支文度弟弘小
名鼠犯顯祖廟諱以小名稱傳子集始及紹先紹先
僭稱大號安西將軍邢巒遣傅豎眼攻武興剋之執
紹先送京師遂滅其國以爲武興鎮復改爲東益州
正光中魏子建爲刺史以恩信招撫遠近款附如內
地焉後以唐永代之氏人悉反承棄城東走自此復
爲氐地紹先奔還武興復自立爲王

魏書

周太祖定秦隴紹先稱藩大統元年紹先請其妻女
太祖奏魏帝還之紹先死子辟邪立十一年於武興

益州以時那爲刺史先是氏首楊法深據陰平
自稱亦盛之苗裔也魏孝昌中舉衆內附廢帝元年
以法深爲黎州刺史二年楊辟那據州反詔南岐州
刺史叱羅協與趙昶討平之是歲楊法深與其種人
楊崇集楊陳倖各擁衆相攻趙昶遣使和解之法深
等從命乃分其部落更置州郡以處之

周書

先是魏恭帝初潭水羌叛車騎將軍趙昶等率步騎
五千討破之恭帝末武興氏反鳳州固道氏魏天王
等亦聚衆響應大將軍豆盧寧等討平之及周世宗

初鳳州人仇周貢等及昶復討平之自是氏羌患息

仙釋

周

尹喜秦人爲函谷關令一日見紫氣自東來乃占風知有神人過適老子至因留入室拜曰願聞至道老子授喜鍊氣吐納之術三宮正一之法喜復求著書以語後世老子曰善以道德五千言畀之喜拜受持誦遂傳於世老子卽於喜宅上昇後喜亦仙去復與老子適於蜀喜號文始先生

漢

盧真人號鐵馬大仙嘗與成紀令觀燈廣陵飛騰俄頃今玉泉觀有仙室遺跡

封君達隴西人初服黃連五十餘年入烏舉山服水銀百餘年還鄉里如二十者常乘青牛故號青牛道士聞有病死者識與不識便以栗間竹管中藥與服或下針應手皆愈不以姓名語人聞魯女生得五岳圖連年請求女生未見授并告節度二百餘歲乃入

元邱山去

按漢武帝內傳其言如此後漢書與甘始東郭延年同傳而省志謂其名銜魏武帝

問養生大略銜曰減思慮節飲食

著有養氣法衛生經數十餘卷云

晉

單道開敦煌人裳衣麤褐不畏寒暑晝夜不臥恒服
細石子一吞數枚好山居石季龍時從西平來一日
行七百里其一沙彌年十四行亦及之至秦州表送
到鄴季龍令佛圖澄與語不能屈也

唐

張果嘗修真於兩當縣之登真洞人傳果老仙踪
雷牛成紀人煉丹於長道縣之南山明皇時宮中有
疾召至長安調治卽愈封雷王今山上藥臼尚存有

古槐一株液出似酒飲之去病人謂雷峰仙酒

法冲咸紀人切而秀異遂祝髮入武都山修業時勅私度者死於是僧多逃暉陽山避難冲憫其饑詣州宰曰如有死事冲身當之但施道糧終獲福佑守宰嘉其烈乃濟之山有虎冲詣告曰今窮谷相授可見容否虎皆遁去

惠印徽州人幼出家通經律文宗召至京師授榮祿大夫司徒銀印賜號真惠國師

元

梁誌通山西介休人號達玄子至元丙子間慕道來
秦功成終玉泉觀未移時在長安灞橋與使客傳鑰
寄徒旬日使至乃知其脫化留跡也詔封烟霞無爲
真人清淨真人劉道通居金蓮洞至德間田守璋薦
之按至德屬唐守璋仕元時代不的始附之
馮真人修煉總真觀有道術凡祈晴禱雨靡不驗有
一石枕黃潤似玉人有疾者以枕捫之卽愈

明

張三丰遼東人名全一一名君寶三丰其號也以其
不修邊幅又號張邈邈頎而偉大耳修髯一衲一篋

所啖升斗輒盡或數月不食或處窮山或遊市井能
一日千里竊笑諧謔旁若無人洪武初居武當山中
二十三年雲遊長安繼至隴上成祖遣官于四方尋
訪未見封通微顯化真人

龐居士名蘊字道元襄陽人脫略俗情深造禪理嘗
遊上邦愛牛頭山之阿築室居焉性好施予不計所
償子曰袖哥女曰靈照舉家白日飛昇後人卽其地
立祠名曰龐公菴

毛公不知何時人相傳有一道人來其家乞食毛公

與之食道人去毛公舉家食其所餘者俱上昇今其宅爲朝元觀

淡道人本清水東鄉人家號素封道人自幼好靜坐不以身家爲念讀書通文字卽學玄門雲遊數十年歸臥西山不親世事明末寇擾遂復入城閉戶獨處一日忽曰吾明日寅刻當去及期沐浴端坐而逝

實際僧也自言山西人爲破山弟子工詩辭行草書明末至清永寓法林寺與鄉人相往來索字句者甚衆居數月忽語人曰今日世緣將盡本意欲還破山

何爲逗留于此夜半沐浴拜佛畢入坐去

國朝

雲極號天祥四川岳池人自幼出家爲僧在峩眉山習靜參禪數十餘載順治二年遊至秦州住西城外關王廟衆僧憫其老留之晝夜不眠惟閉目獨坐至十六年冬跏趺而化

一 元道人平涼人自幼出家於順治十五年至玉泉觀募化施湯忽一日與道友辭遂化去

幻異

拾遺記曰禹鑿龍關之山亦謂之龍門至一空巖深
數十里幽暗不可復行禹乃負火而進有獸狀如豕
銜夜明之珠其光如燭又有青犬行吠於前禹計可
十里迷於晝夜既覺漸明見向來豕犬變爲人形皆
着玄衣又見一神蛇身人面禹因與語神卽示禹以
八卦之圖列於金板之上又有八神侍側禹曰華胥
生聖子是汝耶答曰華胥是九河神女以生余也乃
探玉簡授禹長一尺二寸以合十二時之數使量度

天虺禹卽執持此筒以平定水土蛇身之神卽羲皇也按其言不經而記爲王子年作則山來久矣所以有蛇身人面之傳歟又曰禹至一室有人身如蛇鱗坐於石上度幾近之

錄異傳云秦文公時武都故道雍南山有大梓樹文公伐之輒有大風雨樹生合不斷時有一人病夜往山中聞有鬼言樹神曰秦若使人被髮以朱絲繞樹伐汝汝得不因耶樹神無言明日病人語文公如其言伐樹斷中有一青牛走出入豐水中其後牛出豐水中使騎擊之不勝有騎墮地復上髮解牛畏之入

不出故置髦頭漢魏晉因之

西京雜記曰李廣與兄弟共獵于冥山之北見臥虎焉射之一矢卽斃斷其髑髏以爲枕示服猛也他日復獵于冥山之陽又見臥虎射之沒矢飲羽進而視之乃石也其形類虎退而更射鏃破斨折而石不傷余嘗以問揚子雲子雲曰至誠則金石爲開耳

宋史傳曰大中祥符間有秦州民家子趙抱一者常牧羊田間一夕有叩門召之者以杖引行杖端有氣如煙其香可悅俄至山崖絕頂見數人會飲音樂交

奏與人間無異抱一駭而不測會巡檢司過其下聞
樂聲疑羣盜歡聚集村民梯崖而上至則無所覩抱
一獨在援以下之具言其故凡經夕若俄頃自是不
喜熟食凡火化者未嘗歷口茹甘菊栢菜果實井泉
間亦飲酒貌如嬰兒素不習文墨口占辭句頗成篇
詠有道家之趣遂不親農事野行露宿後至京師猶
卯角詔賜名度爲道士自是間歲或一至京師常令
居太一宮與人言多養生事焉

太平興國中有澶州卒王貴者晝忽見使者來營急

召貴偕行南至河橋驛馬已具卽命乘之俄覺騰虛而去頃之駐馬但見屋室宏麗使者引貴入見其三者容衛制度悉如王者謂貴曰俟汝年五十八當往于闐國北通聖山取一異寶以奉皇帝宜深志之遂復乘馬凌虛而旋軍中失貴已數日矣驗所乘卽營卒之馬也知州宋煦劾貴以聞太宗釋之天禧初貴自陳年已五十八願遵前戒西至于闐等許其行貴至秦州以道遠悔懼俄於市中遇一道士引貴出城登高原問貴所欲具以實對卽命貴閉目少頃令開

視山川頓異道士曰此于闐國北境通聖山也復引
貴觀一池池中有仙童出一物授之謂曰持此奉皇
帝又令瞑目俄頃復至秦州向之道士已失所在發
其物乃玉印也文曰國王趙萬永寶州以獻

先是江南自後漢以來民間有服玩侈靡者人詢之
必對曰此物屬趙寶子又李煜之妓妾嘗染碧經夕
未收會露下其色愈鮮明煜愛之自是宮中競收露
水染碧以衣之謂之天水碧及江南滅方悟趙國姓
也寶年號也天水趙之望也

隆興初吳曦將叛轉運使安丙從事卽錢鞏之與同在河池鞏之嘗夢曦禱神祠以銀杯爲投擲之神起立謂曦曰公何疑公何疑後政事已分付安子文矣又曰安子有才足能辨此覺而異之已而曦叛且授丙僞官丙陰圖之遂誅曦子文丙字也

可泉雜說羅峪某黷貨酗酒忤若父母聞雷輒戰懼逃匿如無所容而父母之凍餒如故一日大雨雷震某乃大啼往跪山澤間雷擊之死背有火文不可辨聞者快之父母舁其尸葬之山阿夫世惟無不養者

有之雷則擊之矣否則天道之或差也

蒲氏記云秦州庠生楊某者性嗜酒每飲歸輒至夜分一夕見覓壯數十輩首如牛犬蹲踞屋脊上舉手加額如掩襲狀生驚怖不成寐是夜地大震鄰家廬舍盡傾生獨得免人共異之生亦莫測其所致云

省志兩當縣東五十里有魚洞一名長春洞每歲暮春魚湧洞中而出不知所從來

近時徽縣山村有虎夜攫食一人留其上體比明路人以告羣往視之則村中偷兒也蓋已犯于官者其

家取而急掩之嘗聞虎噬人月朔則先首月晦則先足物固非有意而所戕者匪人且着因之以示者然亦足以警穿窬之夜出者矣

前數年兩當捕役奉文緝匪於幽谷深林人跡不到處忽得一城其中隱然有衙署廟宇舊蹟不知何時縣治也詢之近鄉居民無一至者但言於日落後遙聞鬼哭其聲甚褻欲跡之無路也邏者大懼而返父老或云自昔有清水縣又有白水赤水黑水等縣此或是其遺歟考元魏地理志有白水縣屬武都郡赤

水縣屬臨洮郡而黑水無聞焉蓋不惟陵谷變遷而
史籍亦難問久矣聊記以廣異聞

附

天寶時宮中畜一鸚鵡聰慧能言一旦羽毛憔悴上
憐而問之頗思鄉否卽應聲曰以思鄉故如此命放
之後使臣過隴山忽聞樹上有聲問上皇安否使臣
不覺淚下

秦州人家收得一乾蟹土人不識有病瘡者借去懸
門戶徃徃遂差

隴西張暹事母至孝母喪廬墓哀感幽顯歲餘而墓

地自裂棺亦自破母還蘇活

出前趙錄

吳曦既誅王喜心懷邪謀欲殺李好義

秦州人

其黨劉

昌國與好義飲好義心腹暴痛洞瀉而死既殮口鼻
爪指皆青黑民莫不哀之摧鋒一軍幾叛既而昌國
白日見好義持刀刺之驚怖仆地卒喜亦尋死

州有逆子毆父仆地忽雷聲旋繞父覆于子身祝曰
我僅一子震死當如我何雷隨息子亦卒爲孝子

鄉民有僱工伏羌人其父來索丁差錢子怒之三人

與之麥子復傾之大罵避去父過雷神廟祝曰如此
不孝子神弗鑑何以神爲忽大霧彌門雷從廟中起
其子已震死箭谿嶺矣

有蠹役素兇悍一日夜出羣犬爭噬之僅餘面目
順治甲午地震山移水湧成壑有人見馬躍浮水面
是夜一民婦攜小兒循山走見二燈前導有鐵牛拽
山夜叉驅後云

乾隆初知州李鉉修太昊宮成有鶴集廟栢因顏其
別院曰來鶴亭明年接任者程號鶴亭也

叢談

周

春秋紀侯爲齊所滅後因以國爲氏隋有司農少卿和整世居天水上邦

孔子弟子狄黑裔孫漢博士山世居天水

楚滅權其孫因以爲氏秦滅楚遷大姓於隴西因居天水

秦滅趙及代王嘉使嘉子公輔王西戎西戎懷之號曰趙王世居隴西天水西縣

漢

漢初姜氏以關東大族徙關中遂居天水

漢徙大姓以實關中上官氏徙隴西上邦

漢高帝五年齊人婁敬戍隴西過洛陽遂說高帝都

關中

文帝後五年春正月行幸隴西

武帝元鼎五年冬十月行幸雍遂踰隴

時出舍卒從官不得食隴

西守自殺

太始二年春正月詔曰往者朕郊見上帝西登隴首

獲白麟呂饋宗廟云云

按稱往者指元鼎五年有朝隲首歌已載藝文

文帝親策賢良文學鼂錯對曰平陽侯臣宿

漢書起曹參子

汝陰侯臣竈

嬰侯

穎陰侯臣何

灌嬰

之子廷尉臣宜昌隴

西太守臣昆邪

公孫昆邪

所選賢良太子家令臣錯昧死

再拜言

觀此則昆邪蓋亦能舉賢者按孝文事宜在武帝前然記以雜名或取之本紀或採於列

傳或得諸他書隨手就錄難以差次亦惟其備焉耳餘俱倣此

李廣與望氣王朔語曰自漢擊匈奴廣未嘗不在其

中然終無尺寸功以得封邑者何也朔曰將軍自念

豈嘗有恨者乎廣曰吾爲隴西守羌嘗反吾誘降者

八百餘人詐而同日殺之至今恨獨此耳朔日禍莫
大於殺已降此迺將軍所以不得侯者也

公孫賓字子叔北地義渠人祖父昆邪景帝時爲隴
西守以將軍擊吳楚有功封平曲侯著書十餘篇賀
少爲騎士從軍數有功封南窳侯坐酎金失侯後代
石慶爲丞相封葛繹侯

平帝時名捕隴西辛興與鮑宣女婚許紺俱過宣
一飯宣不知情坐繫獄自殺先是宣以守闕上書
鈞徒上黨爲其地宜田牧遂家於長子故及

隗囂使馬援如蜀援素與公孫述同里閭相善以爲
既至當握手歡如平生而述盛陳陞衛以延援入交
拜禮畢使出就館更爲援制都布單衣交讓冠會百
官於宗廟中立舊交之位述鸞旗旄騎警蹕就車磬
折而入禮響官屬甚盛欲授援以封侯大將軍位賓
客皆樂留援曉之曰天下雄雌未定公孫不吐哺走
迎國士與圖成敗反脩飾邊幅如偶人形此子何足
久稽天下士乎因辭歸後至洛陽引見於宣德殿光
武迎入謂援曰卿蒞此二帝間今見卿使人大慙援

頓首曰當今之世非獨君擇臣也臣亦擇君矣臣與
公孫述同縣少相善臣前至蜀述陞戟而後進臣臣
今遠來陛下何知非刺客姦人而簡易若是帝復大
笑曰卿非刺客顧說客耳授曰天下反覆盜名字者
不可勝數今見陛下恢廓大度同符高祖乃知帝王
自有真也及歸語囂曰前到朝廷上引見數十每接
讌語自夕至旦才明勇略非人敵也

光武帝建武六年五月辛丑詔惟天水隴西安定北
地吏人爲隗囂所誑誤者自殊死以下皆赦除之

建武八年八月帝自上却晨夜東馳九月乙卯車駕
還宮

十四年十二月癸卯詔益涼二州奴婢自八年以來
自訟在所官一切免爲庶民賣者無還直

中元二年九月赦隴西囚徒減罪一等

安帝延光三年九月乙巳詔敦煌隴西及度遼營其
右趾以下及亡命者贖各有差

順帝建康元年正月辛丑詔遣光祿大夫榮行隴西
漢陽宣暢恩澤勿爲煩擾

鄧騰之西屯漢陽也將左右羽林北軍五校士安帝
幸平樂觀親餞送之

寇恂於建武八年以執金吾從車駕擊隗囂十年奉
詔討高峻峻遣軍師皇甫文出謁恂斬之而峻降諸
將曰高峻精兵萬人西遮隴道連年不下今殺其使
而降其城何也恂曰文峻之腹心其所取計者也全
之則文得其計殺之則峻亡其膽是以降耳諸將皆
曰非所及也

取弁凡所平郡四十六屠城三百未嘗挫折

漢陽太守耿冲者秉之子况之曾孫也

耿恭字伯宗况之孫也初爲長水校尉值隴西羌反上疏言方略詔以恭爲馬防副討平之恭出隴西上言竇融在西州甚得羌心今大鴻臚固卽其子孫宜奉大使鎮撫涼部令車騎將軍防屯軍漢陽以爲威重由是太忤於防奏恭不憂軍事免官歸卒於家建武六年春詔祭遵耿弇蓋延王常馬武劉歆劉向等從天水伐公孫述上幸廣陽城門設祖道閣過將以遵新破漁陽令最在前

諸將之引兵下隴也隗囂尾追甚急獨岑彭殿馬武選精騎還爲後拒身被甲持戟奔擊殺數千人乃得率師東歸

光武封竇融爲安豐侯弟友爲顯親侯中元元年友子固襲封顯親侯十五年拜奉車都尉屯涼州

南單于於漠北遺竇憲古鼎容五斗其傍銘曰仲山甫鼎其萬年子子孫孫永保用憲乃上之詔封憲武陽侯不受明年又封寇軍侯固辭遂將兵出鎮涼州

按憲非以獻鼎得封者鼎特談助耳其文似故云然

馬援好騎善別名馬於交趾得駱越銅鼓乃鑄爲馬式還上之因表曰夫行天莫如龍行地莫如馬昔有騏驎伯樂識之近世西河子輿亦明相法傳儀長孺與丁君都及成紀楊子阿臣援師事子阿受相馬骨法考之有驗今欲形之於生馬則骨法難備具又不
可傳之於後武帝時東門京鑄作銅馬立於魯班門外則更名門曰金馬門臣謹依儀氏鞞中帛氏口齒謝氏脣鬚丁氏身中備此數家骨相以爲法馬高三尺五寸圍四尺四寸詔置宣德殿下以爲名馬式

廉范字叔度廉頗之後也世爲邊郡守或葬隴西因
仕焉永平初隴西太守鄧融備禮謁范爲功曹會融
爲州所舉案范知事譴難解欲以權相濟乃託病求
去融不達其意大恨之范於是東至洛陽變名姓求
代廷尉獄卒若無幾融果徵下獄范遂得衛侍左右
盡心勤勞融怪其貌類范而殊不意乃謂曰卿何似
我故功曹耶范訶之曰君困厄瞽亂邪語遂絕融繫
出困病范隨而養視及死竟不言身自將車送喪至
南陽葬畢乃去

馮魴爲司空永平四年坐考隴西太守鄧融聽任姦
吏策免

建初八年諸竇讚陷梁竦詔使漢陽太守鄭據傳考
竦罪死獄中竦嘗言曰大丈夫生當封侯死當廟食
如其不然閑居可以養志誌書足以自娛作七序

梁竦之孫陽嘉四年爲大將軍虛己進賢辟漢陽
巨覽等爲從事中郎

和帝母梁貴人竦之女也帝立追封謚竦爲褒親愍
侯備禮西迎竦喪

註曰竦死漢陽
獄故自西迎也

賜畫棺玉匣衣衾

改殯帝親臨送葬百官畢會寵遇光於當世焉

韓尊建武中爲隴西太守卒子棧方四歲及壯推父餘財與從昆弟鄉里高之後爲司空

隴西牛述爲外黃今好士知人禮請爰延爲廷椽范丹爲功曹濮陽潛爲主簿常共言談

永初羌反鄧騰欲棄涼州虞詡爲郎中言於太尉李修曰竊聞公卿定策當棄涼州涼州旣棄卽以三輔爲塞三輔爲塞則園陵單外此不可之甚者也嗟曰關西出將關東出相觀其習兵壯勇實過餘州今羌

人所以不敢入據三輔爲心腹之害者以涼州在後
故也其土人所以推鋒執銳無反顧之心者爲臣屬
於漢故也若棄其境域徙其人度安土重遷必生異
志棄之非計修乃更從詡議辟西州豪傑爲掾屬拜
收守子弟爲郎以安慰之

時司徒崔烈亦至棄議傅燮曰涼州天下要衝國家
藩衛高祖初興使酈商別定隴右世宗拓境列置四
郡議者以爲斷匈奴右臂今欲割棄一方萬里之土
使虜得居此地士勁甲堅以爲亂此天下之至慮

社稷之深憂也議乃止

蓋勳爲太守時漢陽叛人王國衆十餘萬攻陳倉三輔震動勳領郡兵五千人自請滿萬人因表用處士扶風孫瑞爲鷹鷄都尉桂陽魏傑爲破敵都尉京兆杜楷爲滅虜都尉弘農楊儒爲梟擊都尉長陵第五雋爲清寇都尉允五都尉皆素有名悉領屬勳每有密事靈帝以手詔問之

蔡邕上七事表有曰伏見涼州刺史劉虔有奉公疾憂之心每有所糾其効尤多

延熹四年冬隴西羌叛段熲將湟中義從討之涼州
刺史郭閔貪其功稽固熲軍使不得進義從役久戀
鄉舊皆悉反叛郭閔歸罪於熲熲坐徵下獄輸作左
校羌遂陸梁吏人守闕訟熲以手數朝廷知熲爲郭
閔所誣詔問其狀熲但謝罪不敢言枉

張奐字然明父惇爲漢陽太守奐後亦持節督涼州
兵兼察刺史二千石能否

王允旣誅董卓卓將校及在位者多涼州人允議罷
其軍其在關中者皆擁兵自守遂合謀爲亂

皇甫嵩既破黃巾威震天下故信都令漢陽閻忠干
說嵩曰難得而易失者時也時至不旋踵者幾也故
聖人順時以動智者因幾以發今將軍遭難得之運
蹈易駭之機而踐運不撫臨機不發將何以保大名
乎嵩曰何謂也忠曰將軍受鉞於暮春收功於末冬
摧強易於折枯消堅甚於湯雪旬月之間神兵電掃
威德震本朝風聲馳海外而北面庸主何以求安乎
嵩曰夙夜在公心不忘忠何故不安忠曰不然昔韓
信不忍一餐之遇而棄三分之業利劍已搥其喉方

發悔毒之歎者機失而謀乖也今主上勢弱於劉項將軍權重於淮陰指撝足以振風雲叱咤可以與雷電赫然奮發因危抵頽崇恩以綏先附振武以臨後服徵冀方之士動七州之衆羽檄先馳於前大軍響振於後蹈流漳河飲馬孟津誅閹官之罪除羣凶之積雖僮兒可使奮拳以致力女子可使褰裳以用命况厲熊羆之卒因迅風之勢哉功業已就天下已順然後請呼上帝示以丕命混齊六合南面稱制移寶器於將興推亡漢於已墜實神機之至會風發之良

時也夫既朽不雕衰世難佐若欲輔難佐之朝雕朽
敗之木是猶逆坂走丸迎風縱棹豈云易哉且今豎
宦羣居同惡如帝上命不行權歸近習昏主之下難
以久居不賞之功讒人側目嬖不早圖後悔無及豈
懼曰非常之謀不施於有常之勢創圖大功豈庸才
所致黃巾細孽敵非秦項新結易散難以濟業且人
未忘主天不祐逆若虛造不冀之功以速朝夕之禍
孰與委忠本朝守其臣節雖云多讒不過放廢猶有
令名死且不朽反常之論所不敢聞忠乃亡去

漢末隴西人宗建在枹罕自稱河首平漢王署置百官三十許年曹操遣夏侯淵擊斬之

劉焉在靈帝時見四方兵寇以爲刺史威輕建議改置牧伯請選重臣以居其任會涼州刺史耿鄙等並爲寇賊所害乃出焉爲監軍使者領益州牧

平帝時漢中錫光爲交阯太守教導民夷漸以禮義化聲祥於任延王莽未閉境拒守建武初遣使貢獻封鹽水侯領南華風始於二守焉

按前於人物志載錫光而疑其於

無考凡閱任延傳乃得之顧省志謂光時陽人史稱漢中爲不同耳

繆彤字豫公汝南召陵人太守隴西梁湛召爲決曹
吏安帝初湛病卒官彤送喪還隴西始葬會西羌反
湛妻子悉避亂它郡彤獨留不去爲起墳冢乃潛穿
井旁以爲窟室晝則隱窺夜則負土及賊平而墳已
立其妻子意彤已死還見大驚關西咸稱傳之共給
車馬衣資彤不受後辟公府爲中牟令卒於官

范丹字史雲陳留外黃人與河內王奐親善奐爲考
城令境接外黃請之不至及奐遷漢陽太守將行丹
乃與弟協共煮麥酒於道側設壇以待之丹見車徒

絡驛遂不自聞惟與弟共辯論於路與識其聲卽下車與相揖邀共前亭宿息以叙分隔再日子遠適千里會面無期故輕行相候以展談別如其相追將有慕貴之譏矣遂去不顧

樊志張者漢中南鄭人嘗遊隴西時段熲出征西羌請見志張其夕熲軍爲羌所圍數重困畜軍中三日不得去夜謂熲曰東南角無復羌宜乘虛引出住百里還師攻之可以全勝熲從之果以破賊於是以狀表聞謂其有梓慎焦董之識有詔特徵會病終

獻帝建安十六年曹操破馬超於渭南超與其將龐德等亡入漢陽

馬超在漢陽復因羌胡爲害氏王千萬叛應超操使夏侯淵討之十九年漢陽尹奉等討超梟其妻子超奔漢中

二十四年夏五月曹操徙武都氏於天水界

延康元年秋武都氏王楊僕率種內附居漢陽郡

漢末李越以隴西反金城太守蘇則率羌胡圍之越請服

後漢

蜀志
典略

馬超字孟起扶風茂陵人父騰字壽成馬援後也其父字子碩爲天水蘭干尉失官因留隴西與羌錯居遂娶羌女生騰騰少貧無產業常從鄣山中斫材木負販詣城市以自供給騰爲人長八尺餘身體洪大面鼻雄異而性賢厚人多敬之靈帝末涼州刺史取鄙任信姦吏民王國等及氐羌反叛州郡募發民中有勇力者欲討之騰應募署軍行事典領部衆討賊有功拜軍司馬其父子由是起餘俱別見

建安中馬超初依張魯魯不足與計事而魯將又多害其能超遂從武都逃入氐中轉奔往蜀聞先主圍劉璋於成都密書請降先主喜曰我得益州矣乃使人潛以兵資之超引軍屯城北未旬而成都潰建興六年丞相亮軍向祁山時天水太守馬遵適出案行參軍事姜維及功曹梁緒主簿尹賞主記梁虔等徒行太守聞蜀軍至而諸縣響應疑維等皆有異心於是夜亡保上邽維等覺太守去追趕至城門門已閉不納維等相率還冀亦不入維等乃俱詣亮

亮元大悅會馬謖敗于街亭乃拔西縣千餘家及維
等還

姜維在蜀爲大將軍平襄侯其裔孫明世居上邦

魏志

徐邈在魏初爲尚書郎常私飲沈醉問以曹事荅曰
中聖人魏武怒鮮于輔進曰平日醉客謂酒清者爲
聖人濁者爲賢人邈性修慎偶醉言耳乃免後爲隴
西太守轉南安所在著稱文帝曰頗復中聖人不對
曰時復中之邈亦州刺史有治功

天水舊有姜闇任趙四姓常推於郡中而薛爲軍家
薛夏恃才不爲降屈四姓欲共治之夏乃游逸東詣
京師後四姓又使囚遙引夏關移潁川收捕繫獄時
魏武已在冀州聞夏爲本郡所質撫掌曰夏無罪也

漢陽兒輩直欲殺之耳乃告潁川使理出之召署軍

謀掾

按人物志載薛夏初以爲史未有考
今於魏志世語得之併識其詳如此

張旣字德容爲羽尚陵人爲雍州刺史魏武曰還君
本州可謂永繡畫行矣後與曹洪破吳蘭於下辯時
徙民以充河北隴西天水南安民相恐動擾擾不安

既假三郡人爲將吏者休課使治屋宅作水碓民心
遂安初既爲兒童時爲郡功曹游殷察異之引既過
家殷先歸勅家具設賓饌及既至殷妻笑曰君其悖
乎張德容童昏小兒何異客哉殷曰卿勿怪方伯之
器也饗訖以子楚託之

游楚字仲允爲蒲阪令時漢興郡缺魏武以問張既
既稱楚才兼文武遂以爲漢興太守後轉隴西楚爲
人慷慨歷位宰守所在以恩德爲治不好刑殺會值
諸葛亮出隴右天水南安太守各棄郡東下楚獨據

隴西召吏民謂之曰太守無恩德今蜀兵攻諸郡吏
民皆應之此亦諸卿富貴之秋也太守本爲國守郡
義在必死卿諸人便可取太守頭持往吏民皆涕泣
言死生當與明府同無有二心楚復言卿曹若不
爲卿畫一計今東二郡已去必將來攻但可共堅
守若國家救到敵必去是爲一郡守義人人獲爵寵
也若官救不到蜀攻日急爾乃取太守以降未爲晚
也吏民遂城守而南安果將蜀兵攻隴西楚遣長史
馬頤出門設陣而白於賊上曉謂蜀師言卿能斷隴

使東兵不上一月之中則隴西吏人不攻自服卿若不能虛自疲傲耳使顓鳴鼓擊之蜀人乃去後十餘日諸軍上隴蜀兵退南安天水兩郡守各獲重刑而楚以功封列侯長史掾屬皆賜拜帝嘉其治詔特聽朝引上殿楚爲人短小而大聲自爲吏初不朝觀被詔登階不知儀式帝令侍中贊引呼隴西太守前楚當言唯而大應稱諾帝顧而笑遂勞勉之

魏初不置涼州自三輔拒西域皆屬雍州文帝置涼州以安定太守鄒岐爲刺史後涼州盧水胡伊健跋

五原郡志卷之三
卷之三
妾台元多等反河西大擾帝曰非張旣莫能安涼州
乃召鄒岐以旣代之

溫恢爲涼州刺史持節領護羌校尉卒汝南孟建代
爲涼州刺史有治名建字公威少與諸葛亮俱游學
亮後出祁山使杜子緒宣意於公威

倉慈爲敦煌太守有德惠天水王遷承代慈雖循其
迹不能及也金城趙基承遷後復不如遷

嚴幹以孝廉拜蒲阪令復舉至孝遷弘農太守及馬
超反幹郡近超民人分散超破爲漢陽太守

景元四年議取蜀鄧艾遣天水太守王頌等直攻姜維營隴西太守牽弘等邀其前一聞鍾會諸軍已入漢中引退還破蜀之後鄧艾以師纂領益州刺史隴西太守牽弘等領蜀中諸郡舊志以師纂爲隴西太守非是此時鄧艾猶在蜀也其隴西太守自是牽弘舊官考師纂爲艾司馬後與鍾會等自艾所作悖逆搃車徵艾遇困續於綿竹斬艾父子纂與俱死纂性急少恩死之日身無完皮卽令當日兼此官亦禾嘗來任隴西也曹髦正元二年十一月以隴右四郡連年受敵或亡叛投賊其親戚畱在本土者不安皆特赦之

晉

晉帝紀宣帝諱懿姓司馬氏

今仍稱名

諸葛亮之至天水

也圍將軍賈嗣魏平於祁山懿進軍隴麋亮自率衆將芟上邽之麥諸將皆懼懿曰亮慮多決少必安營自固然後芟麥吾得二日兼行足矣於是卷甲晨夜赴之進次漢陽與亮相遇兵才接而亮退追至祁山亮屯鹵城據南北二山斷水爲重圍懿拔其圍亮乃去或曰明年麥熟亮必復來隴右無穀宜及冬預運懿曰亮每以糧少爲恨歸必積穀非三稔不能動矣因表徙冀州農夫佃上邽興天水南安監冶

武帝泰始七年夏五月赦秦州殊死以下

秋七月癸酉以車騎將軍賈充爲都督秦涼二州諸軍事充納女儲宮遂不行

元帝建武二年秦州刺史陳安叛降于劉曜

簡文帝咸安二年孝武帝立冬十一月苻堅陷仇池
統秦州刺史楊世

孝武帝太元八年冬十二月仇池公楊世奔還隴右
遣使稱藩

安帝隆安三年春二月仇池公楊盛遣使稱藩

劉曜徙都長安改號曰趙以秦涼二州牧鎮上邦

前秦苻健都長安以秦州刺史鎮上邦

姜岌二紀甲子元歷略曰治歷之道必審日月之行
然後可以上考天時下察地化一失其本則四時變
移故仲尼之作春秋日以繼日月以繼時時以繼年
年以首事明天時者人事之本是以王者重之自皇
羲以降暨於漢魏各自制歷以求厥中考其疏密惟
交會齊蝕可以驗之然書契所記惟春秋著日蝕之
變自隱公訖于哀公凡二百四十二年之間日蝕三

十有六考其晦朔不知用何歷也班固以爲春秋因魯歷魯歷不正故置閏夫其序魯以閏餘一之歲爲部首檢春秋置閏不與此部相符也命歷序曰孔子爲治春秋之故退修殷之故歷使其數可傳於後如是春秋宜用殷歷正之今考其交會不與殷歷相應以殷歷考春秋月朔多不及其日又以檢經率多一日傳率少一日但公羊經傳異朔於理可從而經有蝕朔之驗傳爲失之也服虔解傳用太極上元太極上元乃三統歷劉歆所造元也何緣施於春秋於春

秋而用漢歷於義無乃遠乎傳之違失多矣不惟斯
事而已襄公二十七年冬十有一月乙亥朔日有蝕
之傳曰辰在申司歷過再失閏也考其去交分交會
應在此月而不爲再失閏也案歆歷於春秋日蝕一
朔其餘多在二日因附五行傳著朧與側匿之說云
春秋時諸侯多失其政故月行恒遲歆不以歷失天
而爲之差說日之蝕朔此乃天驗也而歆反以己歷
非此寃天而負時歷也杜預又以爲周衰世亂學者
莫得其真今之所傳七歷皆未必是時王之術也今

以七家之歷以考古今交會信無其驗也皆由五分疏之所致也殷歷以四分一爲斗分三統以一千五百三十九分之三百八十五爲斗分乾象以五百八十九分之一百四十九爲斗分今景初以一千四百四十三分之四百五十五爲斗分疏密不同法數各異殷歷斗分麤故不施於今乾象斗分細故不得通於古景初斗分雖在麤細之中而日之所在乃差四度日月虧已皆不及其次假使日在東井而鍾以月驗之乃在參六度差違乃爾安可以考天時人事



乎今治新歷以二千四百五十一分之六百五爲斗
分日在斗十七度天正之首上可以考合於春秋下
可以取驗於今世以之考春秋三十六蝕正朔者二
十有五蝕二日者二蝕晦者二誤者五凡三十三蝕
其餘蝕經元日諱之名無以考其得失圖緯皆云三
百歲斗歷改憲以今新歷施於春秋之世日蝕多在
朔春秋之世下至於今凡一千餘歲交會弦望故進
退於三蝕之間此法乃可永載用之豈三百歲斗歷
改憲者乎甲子上元以來至魯隱公元年己未歲凡

八萬二千七百三十六至晉孝武太元九年甲申歲
凡八萬三千八百四十一筭上 晉書論曰歲以月
蝕檢日宿度所在爲歷術者宗焉又著渾天論以步
日於黃道駁前儒之失並得其中矣

石鑿都督隴右諸軍事坐論功虛僞免官

李重字茂曾江夏鍾武人父景秦州刺史都亭侯

傅玄字休奕北地泥陽人祖燮漢漢陽太守玄爲御
史中丞上疏曰鄧艾取一時之利不慮後患使鮮卑
數萬散居人間此必爲害之勢也秦州刺史胡烈素

有恩信於西方今烈往諸胡雖已無惡必且消弭然
獸心難保不必其可久安也若後有動爨烈計能制
之惟恐胡虜適困於討擊便能東入安定西赴武威
外名爲降可動復動此二郡非烈所制則惡胡東西
有窟穴浮游之地故復爲患無以禁之也宜更置一
郡於高平川因安定西州都尉募樂徙民重其復除
以充之以通北道漸以實邊詳議此二郡及新置郡
皆使并屬秦州令烈得專御邊之宜帝嘉納之
向雄遷秦州刺史假赤幢曲蓋鼓吹賜錢二十萬

段灼追理鄧艾疏曰鄧艾解狄道之圍畱屯上邦是歲少雨艾爲區種之法手執耒耜率先將士焉

馬隆爲東羌校尉積十餘年威信振於隴右時略陽太守馮翊嚴舒與楊駿通親密圖代隆毀隆年老謬老不宜服戎於是徵隆以舒代鎮氏羌聚結百姓驚懼朝廷恐關隴復擾乃免舒遣隆復職

汝南王司馬亮持節都督關中雍涼諸軍事會秦州刺史胡烈爲羌虜所害亮遣將軍劉旂赴救不進亮是貶爲平西將軍旂當斬亮言咎由節度乞丐旂死

詔免亮官

河間王司馬顥鎮關中選置百官改秦州爲定州

皇甫重字叔倫安定朝那人性沉果有才用爲司空
張華所知稍遷新平太守元康中華版爲秦州刺史
長沙王乂以重弟商爲參軍時河間王顥鎮關中其
將李合與商重有隙請除之重知其謀乃露檄上尙
書以顥信任李合將欲爲亂召集隴上士衆以討合
爲名乂以兵革始寧遣使詔重罷兵徵合爲河南尹
重不奉詔顥遣金城太守游楷隴西太守韓稚等四

郡兵攻之頤起兵攻之又屢敗乃使商間行齋
帝手詔使游楷等罷兵令重進軍討頤商過長安爲
頤所殺重猶閉門堅守城內莫知而四郡兵築土山
攻城重輒以連弩射之所在爲地窟以防外攻權變
百端外軍不得近城將士爲之死戰頤知不可拔乃
表遣御史宣詔喻之令降重知非朝廷本意不奉詔
獲御史騶人問曰我弟將兵來欲至太騶云已爲河
間王所害重失色立殺騶於是城內知無外援遂共

殺重

按華版爲秦州刺史華卽張華版猶表也
或以華版爲人名則重爲何官耶誤矣

郗恢以功進征虜將軍領秦州刺史加督隴上軍

裴黎一名演楷之長兄也其子苞爲秦州刺史

永嘉初東羌校尉韓稚殺秦州刺史張輔時張軌已
霸河西遣兵討之遺稚書曰適得雍州檄云卿稱兵
內侮吾董任一方義在伐叛武旅三萬駱驛繼發伐
木之感心豈可言古之行師全國爲上卿若單馬軍
門者當與卿共平世難也稚得書而降

軌後病風口不能言使子茂攝州事酒泉太守張鎮
潛引秦州刺史賈龕以代軌龕兄責之乃止

建興初徵張茂爲侍中以父老固辭每拜平西將軍
秦州刺史

永昌初茂使將軍韓璞率衆取隴西南安之地以置
秦州

永和中詔遣侍御史俞歸拜張重華護羌校尉涼州
刺史假節是時石虎西中郎將王擢屯結隴上爲苻
雄所破奔重華重華以爲征虜將軍秦州刺史授權
兵使攻秦州尅之遣使上疏曰季龍自斃遺燼游魂
取亂侮亡覩機則發臣今遣前鋒都督裴恒步騎七

萬遙出隴上以俟聖朝赫然之威山東騷擾不足厝
懷長安膏腴宜速平蕩臣守任西荒山川悠遠大誓
六軍不及聽受之末猛將鷹揚不豫告成之次瞻雲
望日孤憤義傷彈劍慷慨中情蘊結於是遣使進重
華爲涼州牧

桓溫入關王擢時鎮隴西馳使於張祚言溫善用兵
勢在難測祚旣震懼又慮擢反噬遣人刺擢不克更
遣其平東將軍秦州刺史牛霸率三千人擊擢破之
擢奔于苻健

永昌元年劉曜討楊韜於南安韜與隴西太守梁

等降于曜皆封列侯
永和初石虎發雍洛秦并州十六萬人城長安未央
宮

石鑿僭位以郎闔爲司空秦州刺史

仇池氏楊世初以地降于苻堅堅署爲平南將軍秦
州刺史仇池公旣而歸順于晉世死子纂代立遂受
天子爵命而絕於堅咸安元年纂降于侯雅送之長
安堅以楊統爲秦州刺史後又以王統爲南秦州刺

史鎮仇池

苻堅遣姚萇等率騎十三萬伐張天錫又遣其秦州刺史苟池等率州人以繼之

苻丕時王統弟廣還自成都奔其兄秦州刺史統爲河州牧毛興所襲亡奔秦州隴西鮮卑匹蘭執之送詣姚萇興旣敗王廣謀伐王統平上邽爲枹罕諸氏所殺

丕以王永爲左丞相永檄州郡討姚萇慕容垂於是天水姜延等承檄起兵各有衆數萬皆封列侯

苻登以竇衝爲車騎大將軍南秦州牧

劉曜之平陳安也以姚弋仲爲平西將軍封平襄公
邑之於隴上及石虎尅上邽弋仲說之曰隴上多豪
秦風猛勁道隆後服道洿先叛宜徙隴上豪強虛其
心腹季龍納之

姚襄初起以天水尹赤爲司馬略陽伏子成爲左部
帥王黑邠爲前部帥強白爲後部帥權翼爲叅軍

姚萇奔渭北遂如馬牧西州豪族尹詳趙曜王欽盧
牛雙狄廣張乾等率五萬餘家推萇爲盟主萇猶豫

天水尹緯說萇曰今百六之數旣臻秦亡之兆已見以將軍威靈命世必能匡濟時艱故豪傑驅馳咸同推仰明公宜降心從議以副羣望不可坐觀沈溺而不拯救之萇乃從緯議以太元九年自稱萬年秦王年號白雀以尹詳爲長史尹緯爲司馬天水狄伯支焦虔梁希龐魏任謙爲從事中郎姜訓閻遵爲掾屬王據焦世蔣秀尹延年牛雙張乾爲叅軍王欽盧姚方成王破虜楊難尹嵩裴騎趙曜狄廣党刪等爲帥又南安龐演姚晃亦爲長史司馬

自狄伯支以下史皆寇以天水

太元中姚萇如秦州王統降萇饗將士於上邽南安人成古詵進曰臣州人殷地險傳傑如林用武之國也王秦州不能收拔賢才三分鼎足而坐玩珠玉以至於此陛下宜散秦州金帛以施六軍旌賢表善以副鄙州之望萇善之擢爲尚書郎

義熙中姚興討仇池公楊盛與諸將會於隴口天水太守王松忿言於刺史姚嵩曰先皇神略無有威武冠世冠軍徐洛生猛毅兼人佐命英輔丹入他池無功而無還非楊盛智勇能全直是地勢然也今以趙

魏之衆使君之威準之先朝實未見成功使君具悉
形迹何不表聞嵩不從爲盛所敗乃具陳松忿之言
與善之

苻堅末年祇星見於東井尹緯知堅將滅喜甚向天
再拜旣而流涕長歎友人略陽桓識怪而問之緯曰
天時如此正是霸王龍飛之秋吾徒杖策之日然知
已難遭恐不得展吾才志是以欣懼交懷

六郡流人之推李特爲主也上邽令任臧始昌令閻
式等上書請依梁統奉竇融故事

李任閻趙上官
楊本六郡之豪

苻堅之亂呂光庶長子纂西奔上邦轉至姑臧

秦始初乞伏祐隣與鮮卑鹿結相攻擊鹿結敗因奔
略陽

乞伏軋歸遣其弟秦州牧乞伏益州討天水姜乳於
上邦羣臣諫不聽益州以驕敗軋歸曰孤違蹇叔以

至於此孤之罪也將士何爲皆赦之

太元中乳逐
姚碩德據之

初武帝假楊飛龍爲征西將軍還居略陽

惠帝元康六年齊萬年之亂略陽天水等六郡民數
萬家流入漢川略陽氏李特振救之由是得衆

李雄之子班爲僞太子時引名士隴西董融天水文
夔等爲賓友

東晉時秦州人鄧定等二千餘家饑餓流入漢中保
於城固漸爲抄盜梁州刺史張殷遣巴西太守張燕
討之守寧急僞乞降於燕并餽燕金銀燕喜爲之緩
師定密結李雄雄遣衆救定燕退定遂進逼漢中

太元十二年後秦徙秦州三萬戶於安定

十九年後秦將強熙叛姚興討之熙敗率戶二千奔

秦州

先是鮮卑勃寒侵隴右苻堅以乞伏司繁爲鎮西將軍以討之勃寒降司繁遂鎮勇士川

咸安初司繁降苻統

直隸秦州新志卷之十二

雜記中
終

一 考 考 考 考 考

考 考 考 考 考

考 考 考 考 考

益 好 學 州 PDG

直隸秦州新志卷之十二下

雜記

叢談

宋

武帝永初元年乞伏熾槃進號安西大將軍

文帝元嘉二年十一月癸酉以前將軍楊玄爲征西將軍北秦州刺史

元嘉七年六月己卯以冠軍將軍氐楊難當爲秦州刺史九年加號征西將軍

元嘉九年六月乙未以征西將軍吐谷渾慕容瓚爲
西秦河二州刺史隴西王

十五年二月丁未以平東將軍吐谷渾慕容延爲鎮
西將軍秦河二州刺史明年改封河南王

二十年七月癸丑以揚文德爲征西將軍比秦州刺
史封武都王

三十年六月辛酉安西將軍西秦河二州刺史吐谷
渾拾寅進號鎮西大將軍

孝武帝孝建二年三月壬子以行征西將軍揚文智

爲征西將軍北秦州刺史

明帝泰始二年秋七月丁酉以仇池太守楊僧嗣爲北秦州刺史武都王明年進號征西將軍

後廢帝元徽四年五月以寧朔將軍武都王楊文慶爲北秦州刺史後進號征西將軍

順帝昇明二年六月丁酉以輔國將軍楊文弘爲北秦州刺史

初武帝定關中將還三秦父老諱悶流涕訖曰殘民不沾王化於今百年始覩衣冠方仰聖澤長安十陵

是公家墳墓咸陽宮殿數千間是公家屋宅捨此欲
何之帝爲之愍然慰譬曰受命朝廷不得擅留感諸
君念本之意今留第二兒令鎮此境乃以次子義真
都督雍涼秦諸軍事委以關中之任尋又進督并東
秦二州領東秦州刺史時隴上流人多在關中望因
大威復得歸本及置東秦州父老知無復經畧隴右
固關中之意咸感歎息

王智從征長安留爲桂陽公義真安西將軍司馬天
水太守

劉道產爲梁南秦二州刺史。言惠化關中流民前後出漢川歸之者甚多。元嘉六年道產表置隴西宗康二郡以領之。

薛安都初仕拓跋氏助其秦州刺史比賀汨擊反。羌曰龍子滅之。由是爲僞雍秦二州都統州各有刺史都總統其事。

仇池之平也以胡崇之爲龍驤將軍北秦州刺史尋爲虜所執。

拓跋濬有散騎常侍鎮西將軍清水公拾遺敕文。

賈思會稽人少有志行爲鄉曲所推重元嘉三年母
亡居喪過禮未葬爲隣人所逼思及妻栢氏號哭奔
救隣近赴助棺櫬得免恩及栢俱見燒死有司奏改
其里爲孝義里蠲租布三世追贈天水部顯親縣左
尉按其人無與此地而其贈
尉則用此官亦佳事也故錄

元嘉中大且渠蒙遜卒文帝以其子茂虔都督秦河
沙涼四州諸軍事涼州刺史河西王茂虔弟儀德爲
征東將軍秦州刺史按此秦州乃假號也宋未嘗得
有其地卽沮渠亦只在河西終
宋之世若宗室名臣都督雍涼南北秦四州
居州諸軍事者其比秦皆假號也今俱弗載

齊

高帝父蕭承之在宋朝爲梁州橫野府司馬漢中太守從蕭思話討氐帥楊難當有功

宋元嘉二十九年高帝領偏將軍征仇池破武興蘭
臯二壘

建元二年冬十一月戊子以氐楊後起爲秦州刺史
三年冬十月戊子以吐谷渾度易侯爲西秦河二州
刺史河南王

武帝永明八年八月乙酉以行河南王世子休留成

爲秦河二州刺史

明帝建武二年秋七月辛卯以氏楊覆之爲北秦州

刺史

四年冬十一月丙辰以氏楊靈珍爲北秦州刺史

焦度字文續南安氏人祖文珪避難至襄陽宋元嘉

中僑立天水郡略陽縣乃屬焉以軍功卒贈梁秦二

州刺史

觀此則南朝所謂秦州天水畧陽者槩可知矣

武帝永明四年造戶籍分置州郡雍州涼州秦州等

三十五州在河南湘州懷州秦州東雍州等十三

在河北凡分魏晉舊司豫青兗冀并幽秦雍涼十
地及宋所失淮北爲三十八州矣

梁

武帝天監元年六月庚戌以行北秦州刺史楊紹先
爲北秦州刺史武都王

天監三年九月壬子以河南王世子伏連籌爲西秦
河二州刺史河南王

中大通元年三月丙辰以河南王阿羅直爲西秦河
沙三州刺史

中大通二年夏四月壬申以河南王佛輔爲西秦河
二州刺史

六年三月己亥以行河南王可沓振爲西秦河二州
刺史河南王

八月己未以南梁州刺史武興王楊紹先爲秦南秦
二州刺史

敬帝紹泰元年鎮北將軍譙秦二州刺史徐嗣徽進
號征北大將軍

按此秦與
譙相近也

曹景宗新野人刺史蕭赤斧拔爲冠軍中兵參軍領

天水太守

漢書無州郡志考齊書雍州有新野郡自南天水郡亦有畧陽西縣皆僞置也然則

蕭赤斧乃雍州刺史也錄此者爲北秦州証也

張纘字伯緒太清中都督雍涼比秦東益郢州之竟

陵司州之隨郡諸軍事

按江左命官都督雍涼者多帶竟陵等處則以雍州原寄

襄陽故也乃其地亦有北秦畝

羊侃於魏正光中爲偏將隸蕭寶寅討秦州羌莫遮

念生念生遣其弟天生寇雍州侃潛身巡塹伺射天

生應弦而倒其衆遂潰侃後歸順以功名終

杜懷寶杜陵人其先自北歸南居於雍州之襄陽遂

家焉大同初懷寶爲梁州刺史值魏梁州刺史元羅
舉州內附懷寶復進督華州時秦州所部武興氏王
楊紹反懷寶擊破之五年卒於鎮第七子崩別見

太清中以徐文盛督涼南秦沙東益巴北巴六州諸
軍事仁威將軍秦州刺史授以東討之任於是文盛
督衆軍東下至武昌

陰子春字幼文父智伯官至梁秦二州刺史普通中
子春累遷至南梁州刺史又遷都督梁秦華三州諸
軍事梁秦二州刺史

簡文帝大寶三年五月魏遣太史潘洛辛等寇秦郡
王僧辯遣杜崩帥衆拒之

承聖三年春正月秦州刺史嚴超達自秦郡圍涇州
侯瑱張彪出石梁爲其聲援六月魏遣將步六汗薩

率衆救涇州

按此則秦郡似與涇州相近然究不知其在何所也

齊將郭元建攻秦州刺史嚴超遠於秦郡王僧辯令
杜崩赴援陳霸先自歐陽來會與元建大戰於士林
崩因縱兵擊大破之

陳

武帝在梁紹泰初爲侍中大都督中外諸軍事表自東討至義興秦州刺史徐嗣徽據其城帝於冶城寺立柵十一月甲辰嗣徽等攻冶城柵帝領精兵出西明門襲擊之嗣徽留人守城自往南州采石以迎齊援十二月癸丑帝遣侯安都領舟師襲嗣徽家口於秦州官軍連艦塞淮口斷賊水路

宣帝大建五年三月己丑北討大都督吳明徹發自白下四月辛亥克秦州水柵辛酉齊軍救秦州明徹又破之五月戊子又克譙郡城秦州城降

觀此數條則南朝之

所謂秦州可知矣事宜附在兵戎

然非真此地之兵戎也故入雜記

元魏紀年之說已見兵戎自茲以後地爲其

所有事較多故加嚴非專秦州者不錄

太平真君六年秦州刺史周鹿觀率衆討汾曲盜薛
永宗不克而還

晉泰元年以車騎大將軍滑州刺史侯莫陳悅爲儀
同三司秦州刺史

文成皇后馮氏長樂信都人父朗秦雍二州刺史坐
事誅后遂入宮

孝文帝欲都洛詔羣官前秦州刺史呂受恩等仍守

愚固帝皆撫而答之詞屈而退

河間公齊與揚保宗對鎮駱谷保宗欲閉險自固秦
州主簿邊因知之密告齊齊晨詣保宗呼曰古弼至
欲宣詔保宗出齊叱左右扶保宗上馬馳驛送臺

元嶠以功除統萬鎮將永昌王仁南征別出汝陰
濟淮宋將劉康祖屯於慰武亭以邀軍路師人患之
嶠曰今大風旣勁若令推草車方軌並進乘風縱烟
火以精兵自後乘之破之必矣從之斬康祖傳首行
宮詔除秦州刺史封隨西公

陽豐公庫汗明於斷决每奉使察行州鎮折獄以情
所歷皆稱之秦州父老詣闕乞庫汗爲刺史者前後
千餘人朝廷許之未及遣而卒

元譚頗強立少爲宗室所推敬出爲高陽太守爲政
嚴斷豪右畏之除安西將軍秦州刺史

杜祖悅京兆人頗有識尚稍遷天水仇池二郡太守
羅衡代人也羅結之後累遷天水太守

古弼代人也宋將裴方明等擊楊難當難當遣使請
拔兵未至難當奔上邽方明克仇池立揚元處子保

職於是假弼節督隴右諸軍宋遣其秦州刺史胡崇
之屯仇池弼與元齊邀崇之於濁水擒之弼復與東
道將皮豹子等討仇池仇池平未幾諸氏復推楊文
德爲主圖仇池弼發上邽等諸軍討之仇池圍解豹
子屯下辯欲還弼止之世祖嘉焉此一人類特
故不入兵戎
王斤鎮長安驕矜不順法度信用左右調役百姓民
不堪之南奔漢川者數千家而委罪於秦州刺史任
延明等世祖召二人問狀知爲斤所誣遣人復按虛
實得數十辜遂斬斤以徇

原觀代人也驍勇有膂力每在軍陳必應募先登以
功進爵金城公除秦州刺史撫馭失和民薛永宗聚
衆於汾曲以叛觀討永宗爲流矢所中世祖幸蒲坂
觀聞帝至驚怖而起瘡重遂卒按前帝紀有周鹿觀
此人也然觀其賊在汾曲而駕
臨蒲坂則是蒲坂之秦州可知

陸真代人也父洛侯秦州刺史真少善騎射以膂力
過人數從征伐以功至大官封侯

陸定國代人龐之子襲父平原王爵恃恩不修法度
坐事免官爵爲兵太和初復除侍中鎮南將軍秦益

正統志卷之九十一
卷之九十一
二州刺史復王爵八年薨於州

王崑北海劇人以父任爲中書學生稍遷南部大夫
至南部尚書在任十四年時南州多事文奏盈几訟
者填門崑性懦緩委隨不斷終日在坐昏睡而已時
人爲之語曰實癡實昏終得保存進爵樂安公出爲
鎮西將軍秦州刺史改爲華山公

秦州呂苟兒反李煥爲平西將軍督兵進討煥遣別
將石長樂等由麥積崖赴援屬都督元薜至遂共平
之

故謹字法順河東汾陰人與其父辯同歸國授河東
太守襲爵汾陰侯世祖尅蒲坂以新舊之民分爲一
郡謹仍爲太守遷秦州刺史將軍如故進安西將軍
涪陵公刺史如故謹自邵遷州威惠兼備風化大行
時兵荒之後儒雅道息謹命立庠教以詩書三農之
暇悉令受業躬巡邑里親加考試於是河汾之地儒
道興焉前於名宦志已註
明茲復脩錄以証

謹孫胤爲都將討秦州反賊支酉生擒斬之

薛世遵代人薛虎子之子景明中爲秦州刺史

韋道福柱陵人父罷仕宋爲秦州刺史

說見官師

皮豹子漁陽人爲仇池鎮將興安二年宋遣其將蕭道成王虬馬光等入漢中別令楊文德楊頭等率諸氐羌圍武都豹子遣人於祁山取馬欲往赴援文德謂豹子欲斷其糧運據險自固豹子上表乞師請遣秦州之民送軍祁山詔益之兵宋將乃退復遣其將殷孝祖修兩當城於清東以逼南境封敕文擊之不克詔豹子助擊之宋遣步卒五千助成兩當去城八里與豹子前鋒候騎相遇卽便交戰豹子軍繼至縱

騎追擊大破之至於城下其免者千餘人而已

皮喜豹子子亦爲仇池鎮將申恩布惠夷民大悅歸附者甚衆於是置廣業固道二郡以居之太和元年劉宋葭蘆戍主楊文度竊據仇池詔喜討之遣平西將軍楊靈珍擊文廣所置仇池太守楊真真衆潰僅而得免喜遂軍於覆津文度遣將守津道懸崖險絕偏閣單行喜兵攀崖涉水衝擊其將追奔西入攻葭蘆城拔之斬文度傳首京師

游曇護太和中爲典寺令慰勞仇池爲賊所害

高欽字君叔魯郡人也欽父有文才欽少習念生之反也欽元帝時西河郡賊爲賊所擒念生以爲黃門郎死於秦州

崔遊字延叔博陵安平人中山王英引爲司馬英敗遊坐徙秦州久而得還後除南秦州刺史爲亂人韓祖香等所執害

薛安都寇弘農執太守李拔等遂逼陝城時秦州刺史杜道生討安都仍執拔等南遁及世祖臨江拔乃

得還按此秦州似非此地

薛道懷安郡之子太和間以鎮南將軍爲秦州刺史
十三年卒子達爲漢陽太守不樂爲郡詔聽解卒

道次安都少子爲安西將軍秦州刺史假河南公子

巒別見

宋弁廣平人次子紀爲秦州大羌令

李崇頓邱人富陽靈珍襲破武興崇督隴右諸軍
討之崇槎山分道進據赤土靈珍遣弟屯龍門躬率
精勇據鷲峽崇遣將從他路夜襲龍門破之乃自攻
靈珍多設疑兵襲尅武興靈珍遠遁

傳永除太中大夫行秦梁二州事代邢巒鎮漢中

裴芬之爲岐州刺史正光末元志西討隴賊軍敗退
守岐州爲賊所圍城陷志與芬之並爲賊擒送於上
邽爲莫折念生所害

李忻榮漢中人以戰歿封其子建爲清水縣開國子
食邑二百戶

尒朱天光討平秦賊元曠以之爲隴西王

盧同范陽人延昌中秦州民反詔同兼通直常侍持
節慰諭之多所降下

常景字永昌河內人也父文通天水太守

張普惠爲光祿大夫時仇池武興羣氏數反西垂郡
戍租運久絕詔普惠爲西道行臺給秦岐涇華雍幽
東秦七州兵武三萬人任其召發送南秦東益二州
兵租分付諸戍普惠至南秦停涇岐華雍幽東秦六
州兵武召秦州兵武四千人分配四統令送租兵連
營接柵相繼而進秦闕字所縮武都武階租頗得達東
益羣羌先款順故廣業仇鳩河池三城粟便得入

賀拔岳以功封清水郡公都督三雍三秦二岐二華

諸軍事後又進督四梁二益等二十州諸軍事

侯莫陳悅代郡人父婆羅門爲駝牛都尉故悅長於河西好田獵便騎射積軍功進爵爲公普泰中除儀同三司秦州刺史永熙初加開府都督隴右諸軍事仍秦州刺史賀拔岳召悅共討靈州悅誘殺岳岳之所部聚於平涼夏州刺史宇文黑獺總岳部衆入隴征悅悅棄城南據山水之險召南秦州刺史李景和景和密降黑獺勒其所部使上驢駝云儀同有教欲還秦州復給悅帳下云儀同欲還秦州汝等何不辦

衆人惶惑皆欲東向趨秦州景和先至據城以擊
輯說部衆離散猜畏旁人不能左右近已與其二弟
并兒及謀殺岳者八九人棄軍逃走數日之中盤回
往來不知所趨乃於中山令從者悉步自乘一騾欲
向靈州中路追騎將及遂縊死野中第息部下悉見
擒殺悅自殺岳後神情恍惚不復如常恒言我僅睡
卽夢見岳語我兄欲何處去隨我不相置因此彌不
自安而致敗滅

馮熙字晉昌長樂信都人文明太后之兄也父朗

至秦雍二州刺史遼西郡公坐事誅

李惠長於思察雍州廳事有燕爭巢鬪已累日惠令人掩獲以弱竹彈兩燕旣而一去一留惠笑謂吏屬曰此留者自計爲巢功重彼去者旣經楚痛理無留心羣下且夫聰察人有負鹽負薪者同釋重擔息於樹陰二人將行爭一羊皮各言藉背之物惠遣爭者出令人置羊皮席上以杖擊之見少益屑曰得其實矣使爭者視之負薪者乃伏而就罪凡所察究多如此類由是吏民莫敢欺犯

惠先爲秦州刺史其事不傳卽此可見故錄之

光武八年始準古班百官之祿以品第各有差先是
天下戶以九品混通戶調帛二匹絮二斤絲一斤粟
二十石至是戶增帛三匹粟二石九斗以爲官司之
祿所調各隨其土所出其雍華秦洛等九州貢綿
絹及絲岐涇秦安營幽等及光郢東秦司州等秦州
河東之蒲坂汾陰縣等數十州郡皆以麻布充稅觀
則當時有秦州有蒲坂之秦州
有東秦有貢綿絹之秦州可見
天平三年秋并肆汾建晉秦陝東雍南汾九州霜旱
民饑流散四年春開倉賑恤而死者甚衆時諸州調

絹不依舊式齊獻武王以其害民請班海內悉以四

十尺爲度天下利焉

此秦州近汾陝

熙平中禁妖言犯者輒死延陵有月光童子劉景暉

者甫九歲人謂其能變爲蛇雉有司以其愚小請依

凡律靈太后令曰可謫畧陽民

正光時莫折念生之亂前河州刺史息景進引念生

攻河州爲行河州高徽所敗景進等皆退奔秦州

按前所稱齊獻武王卽北齊神武帝高歡也先是其年春神武令阿至羅逼西魏秦州刺史建忠王

万俟普撥降之次年春神武以九州霜旱請所在開倉賑給見北齊帝紀

此卷

段榮字子茂姑臧人少好星象之學正光初語人曰
不及十年當有亂或問起於何處當可避乎榮曰亂
源始此無所避也未幾果然天平三年轉行秦州事
榮性溫和所歷皆推仁恕民吏愛之

乞伏令和與兄貴和武平末並開府儀同三司相繼
投周令和授柱國隨大業初卒於秦州總管

薛循義河東人祖仁壽秦州刺史汾陰公

當是薛
謹之後

可朱渾元遼東人從余朱天光以功爲渭州刺史侯

莫陳悅走元收其衆入據秦州爲周攻圍苦戰結盟而罷

皇甫和朝那人其先因官寓居漢中祖澄南齊秦梁二州刺史父徽字子玄梁安定略陽二郡太守

源彪字文宗西平樂都人天統初秦州刺史宋嵩卒

朝廷以州在邊陲以文宗往蒞涇州頗著聲績除秦

州刺史乘傳之府特給後部鼓吹

按文義應是此秦州然彪本傳接云

李孝貞聘陳陳主謂之曰齊朝還遺源涇州來瓜步可謂通和矣及吳明徹寇江南趙彥深謂文宗曰弟往在涇州甚悉江淮間事云云則此涇秦皆南土也前已辨之

太祖宇文氏諱泰字黑獺在魏永熙時爲夏州刺史

秦州刺史侯莫陳悅旣害賀拔岳魏帝詔太祖史氏舊文

統領岳衆太祖與悅書責之悅懼太祖謀已乃詐爲

詔書與秦州刺史万俟普撥令與悅爲黨援普撥疑

之封詔以呈太祖太祖表之並請討悅万俟普撥又

遣其將叱干保洛領二千騎來從軍太祖引兵上隴

悅衆離散退保畧陽太祖卽率輕騎趣畧陽或勸悅

退保上邽以避之時南秦州刺史李弼請爲內應悅

軍驚潰太祖遣兄子導追悅至牽屯山斬之太祖入
上邽收悅府庫財物山積皆以賞士卒毫釐無所取
左右竊一銀鏤甕以歸太祖知而罪之卽剖賜將士
衆大悅太祖乃令衛將軍趙貴行秦州事齊神武聞
秦隴克捷乃遣使來深相依結太祖拒而不納

太祖之討悅也悅遣使請援於齊神武神武使其都
督韓軌將兵一萬據蒲坂而未得入關魏帝進太祖
關內大都督畧陽縣公承制封拜於是以李弼爲秦
州刺史前畧陽郡守張獻爲南岐州刺史

史駱超爲大都督率輕騎一千赴洛

魏大統二年秦州刺史建忠王万俟普撥率所部叛入東魏太祖追之至河北千餘里不及而還

明帝武成元年以柱國蜀國公尉遲迴爲秦州總管武帝保定二年以大將軍蔡國公廣爲秦州總管

五年秋七月庚寅行幸秦州降死罪以下天和三年以柱國陳國公純爲秦州總管

六年以大將軍杞國公亮爲秦州總管

建德三年以大宗伯周昌公侯莫陳瓊爲秦州總管
太祖誅侯莫陳悅遣侯莫陳崇慰撫秦州

若干惠代郡人拜秦州刺史未及之部遷司空

劉昶中山人大象中位至柱國秦靈二州總管弟靖
天水郡守

蕪湛字景儁武功人志行早著與兄亮並有名於時
蕭寶寅西討以湛爲行臺郎中深見委任寶寅將謀
叛逆令湛從母弟天水姜儉謂湛曰吾不能坐受死
亡今便爲身計不復作魏臣也與卿生死榮辱方當

其之故以相報湛聞之舉聲大哭儉遽止之曰何得
便爾湛曰闔門百口卽時屠滅云何不哭哭數十聲
徐謂儉曰爲我白齊王王本以窮而歸人賴朝廷假
王羽翼遂得榮寵至此旣屬國步多虞不能竭誠報
德豈可乘人閔隙便有問鼎之心乎寶寅復令儉謂
湛曰此是救命之計不得不爾湛復不從寶寅素重
之乃聽還武功寶寅後果敗

薛明汾陰人大象末儀同大將軍清水郡守

楊荐秦郡寧夷人進爵清水縣子

韋瓚杜陵人祖千雄魏畧陽郡守

初太祖與魏太子西巡于提之孫實時從太祖刻石於隴山之上錄功臣位以次鐫勒預以實爲儀同太祖常賜諸子馬齊王憲得取駿馬曰色類旣殊或多駿逸太祖喜後從獵隴上獵官馬牧太祖每見駿馬輒曰此我兒馬也命取賜之

隋

高祖文皇帝初仕周年十五封成紀縣公

文帝旣滅陳配其宗室於隴右

開皇二年以大將軍竇榮定爲秦州總管

三年冬以秦王俊爲秦州總管

煬帝大業五年四月西巡至天水大獵於隴西

七年夏煬帝避暑隴川宮

後齊文襄嗣位猶爲魏臣置王高祖秦州使君以下

至獻武王凡四廟

見隋書禮儀志

齊武成中祀高祖秦州刺史等並奏始基之樂

音樂志

楊處綱高祖族父也性質直在官疆濟爲當時所稱

刺蒲州吏民悅之遷秦州總管卒官謚曰恭

吐谷渾主呂夸在位百年屢廢太子其太子謀欲執
呂夸以降請兵於邊吏秦州總管河間王弘請將兵
應之文帝不許

楊尚希弘農人祖直魏天水太守

辛彥之狄道人博涉經史與天水牛弘同志好學

梁彥光安定人祖茂魏秦華二州刺史

齊王楊暕信任小人庫狄仲錡陳智偉二人詣隴西
勸多諸胡責其名馬

宇文述貪鄙隴右諸胡子弟述皆接以恩義呼之爲

兒山是競加餽遺

煬帝大業中以楊玄感初平令裴矩安集隴右

大業中貶博士褚亮西海主簿潘徽威定主簿俱至隴山而徵死亮爲歛瘞人備葬之

唐

太宗皇帝當隋義寧元年爲秦國公時擊敗薛舉兵遂畧地至隴右

貞觀四年十月甲辰帝獵於魚龍川

武后時御史郭翰巡察隴右多所按劾薦狄仁傑

唐宗時太平公主豪富隴右牧馬至萬匹

先光元年十一月明皇巡邊西自河隴而東

開元初吐番寇邊詔常侍解琬與虜定經界琬言吐番不可以信約請調兵十萬屯秦渭間是冬虜果入寇

天寶中蘇毗王沒陵贊欲舉國內附爲吐番所殺子悉諾率首領奔隴右

天寶十五載六月甲午詔親征丙午次河池郡

明皇西幸經河池斜谷左拾遺高適追及帝於河池

隴西郡公瑀從帝幸蜀至河池封漢中王

車駕至河池劔南節度副使竇融勸瑒蜀土腹較羨儲供易辦帝歎其忠卽日拜中書侍郎同平章事

七月丁卯皇太子爲天下兵馬元帥御史中丞裴冕隴西郡司馬劉秩副之

先是開元末命榮王琬巡按隴右至是以豐王珙爲隴右等處節度使以隴西太守鄧景山爲副珙不行咸通四年二月拜秦州經畧使高駢爲南安經畧招討使

德宗時宰相賈耽嗜書尤悉地理時隴右陷於吐蕃異時州遠近有司不復傳耽乃繪布隴右圖上之詔賜幣馬珍器

建中四年朱泚反始泚去鎮留兵五百戍隴上以部將牛雲光督之至是雲光謀請韋臯爲帥將劫以臣泚臯用計悉誅之

貞元初吐蕃尚結贊欲問李晟大興兵踰隴無所掠曰召吾宗乃不牛酒犒軍徐引去

武宗時河南尹王質奏署幕府者若梁國則實河

裴夷直天水趙哲隴西李行方皆一時選云

中和二年僖宗幸蜀都統鄭畋與涇原程宗楚秦州
仇公遇鄜延李孝恭夏州拓拔思恭約盟傳檄天下
初天寶盜起中國用兵而河西隴右不守陷於吐番
至大中咸通始復隴右

陸贄爲相命吏部據內外員三分之計闕集人歲以
爲常是時河西隴右沒於虜河南河北不上計吏員
大率減天寶三之一

宗室世系表載先秦御史大夫李曇生子崇字伯

秦隴西守入漢有隴西太守伯考生尚成紀令因居成紀前涼張駿天水太守李弇弇之祖也其別支在後周有秦河渭三州刺史貞又別房之後有成紀令朝其以隴西郡縣爲封爵者不錄

李嵩第八子詳其後有元魏河秦二州刺史權唐秦州刺史懔秦州叅軍叔綦後魏秦州刺史孝伯宰相世系表裴氏有後魏天水太郡秀業

賈氏有唐河池郡司馬明哲天水都督懷恪

太原王氏有上邽尉向

張華之後有成紀丞思義

漢弓高侯韓顏當之後有東漢隴西太守壽

盧氏有秦州刺史秦卿

孫氏有東漢天水太守魯

天水姜氏有後周秦州刺史遠九真姜氏亦出天水

薛氏有隴西太守上童秦州都督純

韋氏有秦州都督師責秦州刺史協字欽仁

唐氏有秦州刺史茂秦州守仲璨清水令玄道上邦

令昱

鄭興之後有秦州司馬秦客

渾氏有秦州司馬正孫

天水權氏有兩當令頊

令孤氏有上邽令濬

高平徐氏有晉隴西內史暢字彥春

太宗貞觀中詔秦州都督紀王慎等所任州刺史并
功臣令世襲會長孫無忌等固讓遂廢不行

馮益高州人本北燕馮弘之後留番禹爲本郡太守
王世矣益嘗與楊素論兵素奇之拜漢陽太守

裴仲先聞喜人災之子歷秦州都督坐累且誅賴寧
相張說右之免官

王君奐爲隴右節度使吐番寇邊君奐率秦州都督
張景順乘冰度清海襲破之

乾元中岐隴賊郭諳等掠州縣崔光遠爲鳳翔尹喻
降之旣而沈欽不親事諳等陰約黨項及奴刺突厥
敗秦州刺史韋倫於秦隴帝怒光遠無狀召還

廣德元年吐番敗隴右高適爲西川節度使率兵出
南鄙無功

建中二年吐蕃請盟德宗以崔漢衡爲和蕃使往來
要約遂定盟清水

李芄字茂初趙州人解褐上邦主簿嚴武爲京兆尹
薦補長安尉後至尚書右僕射

宣宗太中初續圖凌烟閣諸臣有太子太保同中書
門下三品宋國公蕭瑀 納言檢校并州大都督府
長史天平軍大總管隴右諸軍大使譙縣子婁師德
文昌左相同鳳閣鸞臺三品襲邢國公王及善

中書令河東縣侯張嘉貞 中書侍郎同中書門下

平章事清水縣公李元紘 度支尚書同中書門下

三品范陽郡公盧承慶 納言博昌縣男韋思謙

洛州都督右衛大將軍鄴國公竇軌 中書令漢陽

郡公張柬之 陝州刺史天水郡公邱行恭 冠軍

大將軍左羽林軍大將軍光祿卿天水縣公趙承恩

河西隴右副元帥兵部尚書同中書門下平章事

京國公李抱玉 太原尹兼御史大夫比都留守河

東節度副大使南陽郡公鄧景山 以上諸人或曾官此地或地入衛封

不嫌
備錄

清水之盟隴右節度使張鑑給尚結贊曰唐非牛不
田蕃非馬不戰請用犬豕羊結贊聽諾乃除地爲壇
刑牲壇北雜其血以進約唐地涇州右盡彈箏峽隴
州右極清水鳳州西盡同谷劔南盡西山大度水於
是升壇大享獻酬乃還帝命宰相尚書與虜使者盟
長安而清水之約疆場不定復令崔漢衡決於贊普
乃克盟

長慶元年吐蕃聞回鶻和親犯清塞堡爲李文銳所
逐乃遣使來乞盟帝許之以大理卿劉元鼎爲盟會

使詔宰相與尚書僕射中丞卿尹將軍及吐蕃使者
論納羅盟京師西郊大臣豫盟者悉載名於策明年
請定疆候元鼎與論納羅就盟其國敕虜大臣亦列
名於策元鼎踰成紀武川抵河廣武梁故時城郭未
隳地皆秔稻桃李榆柳岑蔚戶皆唐人見使者塵蓋
夾道觀至龍支城耆老千人拜且泣問天子安否言
頃從軍沒於此今子孫未忍忘唐服朝廷尚念之乎
其何日來言已皆嗚咽過石堡城右行數十里土石
皆赤虜曰赤嶺而信安王禕張守珪所定封石皆計

獨虜所立石猶存蓋隴右故地也

大中三年吐蕃恐熱保渭州求稱爲贊普奉歸唐宣宗命涇原靈武鳳翔邠寧振武等兵迎援恐熱既至倨夸自大且求河渭節度使帝不許還過咸陽橋歎曰我舉大事覲得濟此河與唐分境遂復趨落門川收散卒將寇邊會久雨糧絕奔還廓州於是鳳翔節度使李玘復清水邠寧節度使張欽緒復蕭關鳳翔收秦州是歲河隴高年千餘人見闕下天子爲之御延熹樓賜冠帶

五代

安叔千沙陀人唐明宗時拜秦州刺史更歷四鎮叔千狀貌唐唐而不通文字所爲鄙陋時人謂之沒字碑

晉開運間杜重威爲招討使李守貞爲都監攻下秦州殺二千餘人晉兵素驕而將無節制行營所至居民荼園一空至於草木皆盡

蜀王衍乾德二年冬北巡至於西縣旌旗戈甲連亘百餘里所在供億人不堪命

通志卷之八
卷之二
王衍九年以王承休爲天雄軍節度使天雄軍秦州也承休以宦者得幸妻嚴氏有絕色衍通之明年改元曰咸康以嚴氏故十月幸秦州行至綿谷而唐師入其境衍懼遽還

契丹滅晉漢高祖起於太原中國多故武雄軍節度使何建以秦成階三州附於孟昶昶攻下鳳州於是悉有王衍故地

周世宗伐蜀攻自秦州昶以韓繼勳爲雄武軍節度聞周師來伐歎曰繼勳豈足以當周兵卯客省使趙

季札請行乃以季札爲秦州監軍使季札行至德陽
聞周兵至遽馳還奏事昶召問之季札惶懼不能道
一言昶怒殺之乃遣高彥儔李廷珪出堂倉以拒周
師彥儔大敗走青泥於是秦成階鳳復入於周

歐陽公五代史死節傳贊其畧曰當世宗時王環爲
蜀守秦州攻之久不下其後力屈而降世宗頗嗟其
忠自古忠臣義士之難得也五代之亂三人者或出
於軍卒或出於爲國之臣可勝歎哉可勝歎哉

三人謂王

彥章裴約劉仁贍也王環未嘗死節故別有傳

宋

開寶六年趙普遣親吏詣秦隴市屋材聯巨筏至京師治第吏因之竊貨大木冒稱普市貨鬻都下權三司使趙玘廉得之以聞

太平興國初秦州內附蕃部騷動命翰林司郭守文乘傳撫諭

太平興國八年五月詔長吏誘致關隴流亡

太宗時以國初諸方割據訟五代之制罪人率配隸西北邊多亡投塞外誘羌而寇乃詔當徙者勿復隸

秦州靈武通遠軍及緣邊諸郡

自唐末蕃戶有居渭南者溫仲舒知秦州驅之渭北立堡柵以限其往來太宗覽奏不懌因命寇準使渭北安撫族帳

淳化二年十二月賜秦州童子譚孺卿本科出身

景德三年九月秦州言野兒和尚族部落尤大能稟朝命凡諸族爲寇盜者輒遏絕之請加增三峽都首領

大中祥符四年帝祀汾陰秦州回鶻安密獻玉帶於

道左

大中祥符五年秦州遣指揮楊知進譯者郭敏送回
鶻進奉使至甘州爲蕃所阻

大中祥符七年十一月詔給秦州七砦熟戶首領都
軍主以下百四十六人告身

大中祥符九年知許州石普上言商賈自秦州來言
唃廝囉欲陰報曹瑋請以臣所獻陣圖付瑋可使瑋
必勝上以普言踰分除名

大中祥符九年唃廝囉立遵等數使人求內屬明道初

卽授廝羅寧遠大將軍愛州團練使授逋哥歸化將軍

真宗初田錫出使秦隴還連上章言隴西苦靈夏之役生民重困上爲之戚然

真宗謂李迪曰曹瑋在秦州屢請益兵未及遣邊解州事第怯耳誰可代瑋者迪對曰瑋知唃廝囉欲入寇且窺關中故請益兵爲備非怯也且瑋者謀畧諸將皆非其比何可代未久唃廝囉果犯邊秦州方出與復召迪問曰瑋此舉勝乎對曰必勝居數日奏至

瑋與敵戰三都谷果大勝帝曰卿何以知瑋必勝迪
曰峭廝囉兵遠來使謀者聲言以某日下秦州會食
以激怒瑋瑋勒兵不動坐待敵至是以逸待勞也

仁宗時秦州與羌人爭古渭地仁宗問劉敞棄守孰
便敞曰若新城可以蔽秦州長無羌人之慮傾國守
焉可也或地形險利賊乘之以擾我邊鄙傾國爭焉
可也今何所重輕規小利而使曲在中國議者多不
同秦州自是多事

仁宗時隴安縣民誣平民五人爲劫盜尉悉執之一

人掠死四人遂引服其家辯於州州不爲理悉論
未幾秦州捕得真盜隴州吏當坐法而會赦帝怒特
貶知州孫濟爲雷州叅軍餘皆除名流嶺南賜錢粟
五家復其役三年

嘉祐中于闐使者入朝過秦州留月餘壞傳舍什吞
縱其徒入市掠餘食過鳳翔陳希亮乃治之

宋時大食入朝由沙州涉夏國抵秦州天聖後恐爲
西人鈔畧乃詔取海路由廣州

西渭州距秦州三百里道經啞兒峽邊城數請城之

朝廷以饋餉之艱不許范祥權領州事驟請修築未報輒自興役蕃部驚擾青唐族羌攻破廣吳嶺堡圍啞兒峽砦官軍戰死者千餘祥坐削一官

元豐四年西夏有李將軍清者本秦人說秉常以河南地歸宋其國母知之遂誅清而奪秉常政

神宗時令內侍李憲乘驛計議鳳翔邊事諸將皆聽節度中丞鄧閔甫御史周尹等極諫上弗聽

宋范鎮未仕時兄鎡卒於隴城無子鎮聞其有遺腹子在外徒步求之二年乃得之曰吾兄體有四乳是

兒必然已果然

元祐二年八月鬼章就擒檻送京師尋赦之授陪戎校尉遣赦秦州聽招其子以自贖

哲宗紹聖中去熙州鍾傳擅帥熙秦騎四萬出塞無功而還

徽宗時帝怒五路將帥劉仲武等十八人親書其姓名敕侍御史侯蒙往秦州逮治至秦仲武等囚服聽命蒙曰君輩皆侯伯無庸以獄吏辱第以實對因奏請赦之

大觀二年九月曲赦秦鳳永興軍路

宣和間金人犯京師宣贊舍人吳革請帝幸秦州

建炎三年張浚入討苗傅傳以堂帖趣浚赴秦州

建炎五年張浚敗於富平王庶勸浚收熙河秦鳳之
兵據關隴以爲後圖浚不納

紹興三年十一月宣撫司分陝西之地自秦鳳至洋
河以利州制置使吳玠主之屯仙人關

紹興五年金蒲察胡盞擊關師古於臨洮衆三萬餘
從攻涇州從破德順秦鞏臨洮河蘭等州破吳玠兵

謂盡皆有力焉

紹興間與金和金欲盡取階成岷鳳秦商六州分畫地界使鄭剛中力爭不從又欲姑取商秦於大散關立界剛中又不從

紹興中秦隴叛兵欲窺蜀宣撫使盧德原勤拊循嚴守禦傳檄諸路人心以安

紹興九年李顯忠自延安南奔至河池縣見吳玠玠曰忠義歸朝惟君第一

九月命秦鳳路招納蕃部熟戶及陷沒夏國軍民

紹興三十年金轉運使毛碩以鞏會德順道路多險
鹽引斤數太重請一引分作三四以從輕便朝廷皆
從之秦州倉粟陳積而百姓有支移者止就本州折
納其直公私便之

隆興元年史浩欲棄陝西朝臣有言西事者詔官軍
進討東不可過寶鷄北不可過德順且欲用忠義人
守新復州郡而官軍退守蜀口吳璘遂歸河池

隆興元年正月吳璘奉詔還河池金人乘其後亡軍
三萬餘遂陷新復十三州軍

孝宗時通判夔州陸游爲宣撫王炎陳進取之策謂
經畧中原必自長安始取長安必自隴右始

開禧二年韓侂胄欲用兵吳曦將西軍六萬駐河池
金人取成州曦乃焚河池還興州

開禧三年都統孫忠銳由鳳州攻大散關克之而遽
還鳳州關復陷宣撫參議楊巨源至鳳州執忠銳斬
之

吳曦反轉運使安丙時同居河池遂謀誅之

先是神宗初立詔度渭秦延四州通判其選並從中

書母以恩例奏授

熙寧五年二月以呂公弼爲宣徽南院使判秦州

冬十月減秦鳳囚罪一等

七年閏四月以宣徽北院使張方平判永興分秦鳳

路兵爲四將

按此當入兵戎而命官則在雜記且雜記不拘先後可連而後及之後倣此

建中靖國元年汰秦鳳路二兵

紹興十一年七月詔優獎秦隴等州縣官到任半年

減磨勘任滿遷一官

嘉定十一年七月奪知天水軍黃炎孫三官辰州居

住

上年冬金兵延
湫池堡炎孫道

王仁贍宋初授武德使知秦州後還朝廉得近臣戚
里遣人市竹木秦隴間聯巨筏至京師所過關渡矯
稱制免筭既至厚結有司悉官市之倍收其直仁贍
密奏之太祖怒多所降罰

王顯字德明由樞密移知秦州初溫仲舒知州日開
拓山林諷蕃部獻其地後朝廷雖嘗給還而採伐如
故顯言乃者朝命以趙保吉修貢邊城務使安靜若
今動衆開斥疆境非便從之

郭載關封人知秦州兼沿邊都巡檢使先是巡邊者
多負兵騎以威戎人所至頗煩苦之載悉滅去戎人
感悅

何中立除龍圖閣直學士知秦州言者以爲非治邊
才改慶州奏曰臣不堪於秦則不堪於慶矣願守汝
不報

呂夷簡參知政事事王曾謹甚曾力薦爲相及夷簡
位曾上任事久多所專決曾不能堪論議間有異同
遂求罷仁宗疑以問曾曰卿亦有所不足耶時外傳

知秦州王繼明納賂夷簡曾因及之帝以問夷簡曾
與夷簡交論帝前曾言亦有過者遂與夷簡俱罷
秦隴斜谷務造船材木率課取於民又七州出賦河
橋竹索但數十萬包拯爲陝西轉運使皆奏罷之
胡宗回知秦州屬羌郎阿章叛宗回遣將王吉魏釗
討之皆敗死又促鈐轄种朴往亦死之坐奪職未幾
錄其堅守湟鄯之議復起知秦州

華居厚知秦州降羌在州者逸入京師訴事坐失察
削職

陸師聞知秦州諸道方進築被爵賞師聞在秦無所
事快悒不釋曾布議使督本部兵赴熙河共攻師聞
奉命踴躍集兵四萬以待而章惇陰諷熙帥鍾傅先
出塞敕師聞聽傅節制築淺井又築虬羅皆不成而
還傅更檄會兵於鎮耳關未至復卻秦鳳之師再出
再返勞且弊言者乞加責不聽召爲戶部侍郎未及
拜坐秦州詎增首虜事落職

金人旣得秦州經畧使張深遣熙河副總管劉惟輔
率兵禦之又檄隴右都護張巖往追之至鳳翔境上

嚴與曲端期而不至徑前遇伏死之惟輔遁歸

前於官師

志謂張深無考今於惟輔傳得之殆卽此人耶蓋秦州經畧也

代淵字蘊之本代州人舉進士甲科爲清水主簿歎曰祿不及親何所爲耶還家教授舉鳳州團練推官不就著周易旨要老佛雜說數十篇

杜彥鈞景德中爲天雄軍副都部署大中祥符五年復知莫州馬和節爲潁川防禦使彥鈞換秦州

宗以外戚得官授秦州刺史徙滑州性暴戾復相氣所至爲人患

紹聖中知秦州游師雄言于闐大食拂菻等國貢奉
般次踵至有司憚於供賚抑留邊方限二歲一進外
更募義萬里而至此非所以來遠人也從之自是訖
於宣和朝享不絕

金

大定二年徒單合喜定秦隴叅政石琚請曲赦秦隴
以定百姓從之

貞祐初烏古論克州置秦州權場宣撫副使完顏弼
以擅置移文問之克州曰近日入見許出外從宜行

事秦州自宋兵焚蕩榷場幾一年矣今旣安帖復宜
開設彼此獲利歲收以十萬計對境天水軍移文來
請如俟報可實慮後時弼奏其事宰臣以兗州雖擅
舉而無違失苟利於民專之亦可宣宗曰朕固嘗許
其從宜也

李文秀據秦州宣宗詔鳳翔軍討之軍圍秦州城時
爰申在軍中有罪當死宣宗問之樞帥有知其名者
奏此人將相材忠實可倚宣宗命馳赦之以爲德順
節度使行元帥府事

大定十一年右警巡使李寶以多支俸粟折錢杖謫
清水縣令

高衍爲吏部員外郎以擬選有私決杖降爲清水縣
主簿

傅慎微字幾先其先秦州沙溪人遷居長安宋末登
進士累官經制使兵敗入金爲禮部尚書修國史
蒲察婁室從元帥攻下西和州白撒由秦州進兵抵
棧道宋人來拒婁室乘高立幟策馬旋走揚塵爲疑
兵別遣精騎掩出其後宋兵大潰進丹州刺史

張中彥字才甫與秦鳳李彥琦攻宋將關師古下饒
鳳關代彥琦爲秦鳳經畧使秦州當要衝而城不可
守中彥徙治北山因險爲壘今秦州是也築廐家諸
城以扼蜀道帥秦凡十年

李獻可字仲和大定十年中進士第世宗喜曰太后
家有子孫舉進士甚盛事也累官戶部員外郎坐事
降清水令終山東提刑使衛紹王卽位以元舅故追
封道國公

元

至元二十一年秦州總管劉發有罪伏誅

仁宗時秦州山移御史馬祖常言山不動之物今而動焉由在野有當用不用之賢在官有當言不言之佞故致然爾疏聞大臣皆家居待罪

初金之亡也唯秦鞏二十餘州久未下耶律楚材奏曰往年吾民逃罪或萃於此故以死拒戰若許以不殺將不攻自下矣詔下諸城皆降

元初併京兆四川爲一道以廉希憲爲宣撫使劉太平等將爲亂時關中無兵備命汪惟良將秦鞏諸軍

進六盤惟良以未得上旨爲辭希獻卽解所佩虎符
銀印授之曰此皆身承密旨但辦吾事已飛奏矣
鞏昌帥府言鎮戎州有謀爲叛者連引四百餘人希
獻詳推之惟誅首惡五人

王楸從征西夏及秦州夏人盡撤橋梁爲備軍阻不
得前楸夜督士卒運木石北曉橋成軍乃得進

世祖出王秦中以姚樞爲勸農使教民畊植又思所
以化秦人乃詔許衡爲京兆提學秦人新脫於兵聞
衡來莫不喜郡縣皆建學校民大化之

明

洪武初明昇守將丁世貞失文州來圍秦州五十日
其敗夜宿梓潼廟其下殺之

成化時秦紘服闋復任秦州尋擢鞏昌知府十三年
巡撫山西以奏宗藩罪爲王所誣逮治無驗而內官
尚亨籍紘家以所得敝衣數事奏帝歎曰紘貧一至
此耶賜鈔萬貫旌之

嘉靖間帝幸承天河南巡撫胡纘宗以事辱陽武令
王璠璠素兇狡爲巡按陶欽夔劾罷以毆父論死父

請出之復坐殺人不得解乃撻纘宗迎駕詩穆王八
駿語爲謗詛言纘宗命已刊布不從屬欽夔論黜羅
繼成大肆候長至日令其子詐爲常朝官闌入闕門
訟冤凡所不說悉構入之帝大怒立遣官捕纘宗等
下獄法司盡得其誣罔仍坐聯父子碎然帝怒猶甚
乃革纘宗職並除法司名承問者皆下詔獄焉

萬歷中廷推閣臣用於慎行李廷機葉向高而召王
錫爵於家以爲首輔給事中胡忻以廷機之用朱賡
寶圭之疏誠廷機並侵賡賡等率忻請停其贈諡疏

不當

李三才總督漕運淮人深德之及都御史缺需次內
召而忌者日衆相繼劾之給事中胡忻等交章論救
三才亦力請罷遂自引去其後力爲東林辨白有曰
以大臣之賢者言之則葉向高去矣王象乾輩去矣
曹子沛胡忻去矣云云

洪承疇禦流賊於秦州賊遂越兩當襲破鳳縣分爲
二將會漢興窺商維適五省總督陳奇瑜以湖廣賊
盡鼓行而西遣將扼諸要害賊見官軍肆集大懼悉

道人興安之車廂峽諸渠魁李自成張獻忠等咸在焉。峽四山巖立中亘四十里易入難出賊誤入其中官軍蹙之可盡。穢奇瑜不知大計許其僞降悉勞遣歸農既出棧道遂不可復制焉。

魏閣之黨有石三畏者爲忠賢十孩兒之一爲御史追論京察三變力詆李三才胡忻等十五人生者除名死者追奪鍛成楊左之獄一日飲醉誤令優人演劉瑾酗酒一劇忠賢怒削籍歸璫誅復起旋罷又有門克新者汝陽人由青州推官擢御史諂事璫請誅

熊廷弼復陷陳仁錫文震孟等並削籍遂巡按山東
崇禎初引疾去

瑞王常浩神宗第五子天啟末之藩漢中時流寇劇
封地當賊衝王上書有曰督臣洪承疇單騎裹甲出
入萬山賊始敗遁近境稍寧旣而鳳縣再陷蜀賊入
秦州遂犯郡界幸諸將力拒賊方稍退云云亦可以
想見當時情事

勝語

漢武帝末年遣隴西任立政等至匈奴招李陵歸陵弗歸時霍光上官傑素與陵善而立政等三人又皆陵故人故遣之

唐高宗總章中將幸涼州時隴右虛耗議者以爲非便高宗聞之召五品以上謂曰帝王五載一巡狩群后四年一朝此蓋常禮朕欲暫幸涼州乃聞中外咸謂非宜宰臣已下莫有對者詳刑大夫來公敏進曰陛下巡幸涼州布宣王畧求之故實未虛令典但隨

時度事臣下竊有所疑高麗雖平餘寇尚梗西道經
畧兵猶未停且隴右諸州人戶少寡供侍車駕備擬
稍闕臣聞中外實有竊議高宗曰既有此言我止度
隴存問故老蒐符卽還

唐相止贈一代權德輿罷相爲檢校吏部尚書與元
節度使自潤州改葬其父於東都亡祖之域其祖僅
終右羽林軍錄事叅軍因表納檢校吏部尚書兼御
史大夫請同贈祖一官詔不許綉官特贈僅尚書禮
部郎中

獨孤郁權相子璿也歷掌內外制有美名憲宗歎曰
我女璿不如德輿孔戣爲華州刺史奏江淮進海味
道路擾人并其類十數條後上不記其名問裴晉公
亦不能對久之方省乃拜戣嶺南節度有異政

憲宗時權長孺知監福建院贓敗有司上其獄崔相
羣救曰此德輿族子上曰德輿不合有子弟犯贓使
德輿自犯朕且不赦後知其母老免死杖一百流康

州

宋丞相呂端器識遠大年五十六七猶爲太常丞克

開封府判官時秦州楊平木塲坊木筏沿程免稅而
至京呂之親舊競托選買呂皆從而買之於是入官
者多棟退材植值三司使發其事欲傾衆人無何呂
獨當之認爲已買太宗赫怒俾臺司柳頊送商於安
置滅耳後猶簽書府中舊事怡然曰但將來但將來
著枷判事自古有之

李繼隆討虜與轉運使盧之翰有隙欲陷之罪乃檄
令辦芻粟期以八月出塞調發方集忽改十月適翰
輓者散復檄云賊且入塞即日進軍倉卒不可復集

遂奏轉運司乏軍興太宗大怒立遣使馳取轉運司
三人首丞相呂端不敢言樞密副使錢若水請先推
驗然後行誅未晚帝大怒入內若水留不去出復諫
曰繼隆外戚貴重莫比今據其一幅奏書誅三轉運
使雖有罪天下何由知之上意解乃先令責狀三人
畜黜既而虜欲出塞事虛繼隆坐罷招討知秦州

曹武穆公在秦州有士卒十餘人叛赴虜中軍吏來
告公方與客奕棊不應軍吏亟言之公怒叱之曰吾
固遣之去汝再三告何耶虜聞之亟歸語其將盡殺

之

曲端字平甫鎮戎軍人知書善屬文作字奇偉長於
兵畧屢戰有聲知延安府時與節制王庶有隙金犯
環慶端遣吳玠拒之戰少却玠違節制玠因恨之
張浚信讒屢黜端後與金戰僞立前軍都統制曲端
旗以懼之敵知其詐浚敗而愧將叙復之玠與庶以
端嘗作詩云不向關中圖事業却來江上汎扁舟浚
大忌之遂下端秦州獄使獄官笮取其病狀端欬然
引筆書之卽進械牛之鐵籠熾火逼之殊極慘惡端

渴甚求飲與之酒九竅流血而死年四十一時建炎
四年八月三日丁卯申時也陝西軍士皆流涕悵悵
多叛去者浚尋得罪詔追復端官謚莊閔制曰屬委
任之非人致刑誅之橫被興言及此流涕何追

陳了翁名重一時爲右司員外郎曾布欲引以附已
屢薦於止了翁謂其子正彙曰吾與丞相議多不合
今乃欲以官相餌吾有一書將遺之汝爲我書且曰
郊恩轉遠恐失汝官奈何正彙再拜願得書了翁喜
明日持以見曾相於都堂適與左司宋彥會待於賓

次朱借讀其書動色布見之笑曰此書他人得之必

怒布則不然雖十書不較也了翁退卽錄所上書以

狀申三省曰瓘不達大體觸忤大臣伏乞敷奏早行

竄黜遂出知秦州

書載藝文補遺
坐罪流削坎墮不自悔云

正彙後

唐時文武參用宋循其制慶歷初韓范龐王四公皆

換觀察使以用兵擢之也龍圖閣直學士馬季良換

秦州防禦使非美遷也

曾布亦嘗知秦州其母朱氏乃徐氏外生手無中指

節故西樞亦然

西樞者
布官也

世以其異故貴不知其氣所

傳自外氏諸徐諸徐在江南世以漕坂爲業早結於
藝祖問以何爲異日驗徐氏曰某全家及手指不過
存中節世謂徐鷄爪云

呂文靖生四子公弼公著公奭公孺皆少時文靖與
夫人語四兒他日皆繫金帶但未知誰作相夫人使
小鬟擊四寶器貯茶而往故跌碎之三子皆失聲獨
公著凝然不動後果大拜公弼公孺皆曾官秦州

曹太尉彬天性仁恕下江南日不戮一人平居第宅
每冬月不令修葺曰牆壁之間百蟲所蟄不可傷其

生其愛物如此四子璨瑋珀琮皆享豐祿瑋琮先後
歷秦州官

陳省華初爲隴城主簿後封秦國公子堯咨復知秦
州三子皆貴秦公尚無恙每賓客至其家堯佐及仲
季子侍立左右坐客踧踖不安求去公笑曰此兒子
輩爾後天下皆以秦公教子爲法時人榮之

狄武襄每入陣輒披髮戴銅面具所向無敵其始故
黥卒也既貴帝令去其面涅對曰臣以是得有今日
竟不易後受命討儂智高既至軍斬大將陳曙以違

節制時孫沔余靖皆在坐爲之股栗

韓魏公嘗言狄青爲副帥一日宴公惟劉易先生與焉易性素疎時優人以儒爲戲易勃然謂黥卒敢如此罵不絕口至擲樽俎以起而青氣殊自若不少動笑語溫然次日首造劉易謝之公於是時已知其有量云

羣師中爲布衣父坐鎮戎退陣當斬韓公馳至鎮戎以刃乘我寡非諸將罪且欲戮其爲首一人師中父任貸中方請於朝會師中試南宮遂上書論公募民

爲公征應賊大擾乞斬公以謝陝西旣不行後有疑
公必執政有罪勿害師中者公笑曰彼是時以子救
父豈可加罪人聞之咸服其公恕而師中猶未之信
後擢爲兩制方愧服且深謝之師中亦嘗知秦州有
政績

宋初以私市秦隴竹木獲譴者又有翰林使杜彥圭
四廂都指揮使趙延溥武德副使竇神興左領軍衛
上將軍祁廷訓駙馬都尉王承衍魏咸信

理宗時有知秦州龔集觀史舊文非此秦州也

元順帝至正十五年徵徽州隱士鄭玉爲翰林待制
不至恐或是江南之徽州謹從闕疑

卷之三

卷之三

五

新加坡大學
PDG

別錄

渾儀

伏羲氏立渾儀測北極高下量日影短長定南北東西觀星間廣狹自伏羲甲寅年至宋大中祥符三年

庚戌歲積三千八百九十七年

宋時常顯符傳顯符當淳化初爲司天

監表請造銅渾儀至道元年渾儀成至是顯符上其法要十卷序之云云按從來言渾天無以爲伏羲造儀者獨顯符云然以理推之當不誣也又溯其甲寅年蓋只在黃帝六十一年甲子前二百五十年耳其說尤難而可信是時邵子猶未生其經世紀年且本以此矣故特表出之亦足以破千古之疑

月歷

伏羲在位百一十年始有甲歷五運

通歷

伏羲紀陽氣

之初爲律法建五氣立五常定五行有甲歷五運

通鑑

外紀 觀此益可爲立儀之證蓋不測儀何以有歷也

重卦

伏羲德合上下天應以鳥獸文章地應以龜文圖書

乃則象作易

禮緯合文嘉

帝曰惟天至仁於草生月天雨

降河龍馬負圖神開我心

古三墳

庖羲作八卦始有筮

古文

伏羲造八卦始作三畫以象二十四氣因而重

之爻象備矣

通鑑外紀

六書

伏羲氏始畫八卦命臣飛龍氏造六書

古三墳

太昊作

龍書

墨

庖犧成八卦蒼頡創六文鳳羽其字韋理成

文豈但人力亦猶天授

顧野王語

琴

伏羲氏斲木爲琴綸絲爲絃二十有七而音樂自是

史琴自伏羲作

白虎通

伏羲削桐爲琴面圓法天底

象地龍池八寸通八風鳳池四寸象四氣

蔡邕論

庖犧作琴以修身理性反其真也

琴操

伏羲樂曰立基

樂書

瑟

伏羲氏作二十五絃之瑟通歷庖犧瑟五十絃黃帝使

素女鼓瑟哀不自勝乃破爲二十五絃世本瑟潔也使

人精潔於心淳一於行今上朱襄氏使士達作五絃之

瑟呂氏春秋伏羲作瑟三十六絃蓋瑟屬陰故用十六之

數世紀

簫

伏羲氏作簫十管簫肅也其聲肅肅而清也通禮

管

女媧氏命娥陵氏制都良管以一天下之音命聖女氏爲班管合日月星辰名曰充樂旣成天下無不得

理

御覽帝系譜

笙

女媧氏作笙簧笙生也象物貫地而生以匏爲之其

中空而受簧也

世本

笛

黃帝使伶倫伐竹於昆谿作籥吹之作鳳鳴

史記

黃帝時兩在縣獻昭華玉瑄漢入關中得秦府庫所
藏有節尺二尺二寸亦明昭華瑄

事物紀元

黃帝作律呂以玉爲管長徑尺六孔爲十二音以象
鳳凰之鳴其雄鳴者爲律其雌鳴者爲呂晉武帝時
汲冢亦獲玉律尚書中候曰用玉爲律東漢以玉律
十二候氣先王之法也以六十律候氣蓋京房之陋

歟樂書

星歷

黃帝獲寶鼎迎日推筭晉灼曰策數也瓚曰日月朔望未來而推之故曰迎日

史記

雙角

黃帝會群臣於泰山作清角之音橫吹之似兩鳳雙鳴二龍齊吟樂錄亦云蚩尤氏率魍魎與黃帝戰於涿鹿之野黃帝乃命吹角爲龍吟以禦之

夔鼓

昔東海流波山有獸焉其音如雷命之爲夔黃帝得之以皮作鼓擗以雷獸之骨聲聞五百里以威天下

等

箏秦聲也按禮樂記箏五絃筑聲今并涼二州箏形如瑟不知誰所改易也李斯書云夫擊甕叩缶彈箏搏髀而歌呼嗚嗚快耳者正秦聲也楊惲書云家本秦也能爲秦聲曹丕詩云秦箏發新聲

缶

缶形如足盆或曰形如覆盆以四杖擊之昔秦趙會於澠池秦王爲趙王擊缶卽此右四條俱出省志按黃帝制作頗多以舊有生於天水之說故因記音樂而類及之又此地同秦之始封也故彈箏吹缶亦不嫌備錄云

松雪草書

明嘉靖庚戌巡按御史劉崙登天靖山謁李杜祠鐫
趙子昂草書唐詩於石爲四碑置諸祠中并誌之曰
趙松雪書法蚤歲得之王右軍後有感於管夫人之
言乃自成一家而風格不羣膾炙人人者亦不在右
軍下然其傳盛於江之南北余入秦偶見此本守巡
李君時達請付諸石余惟秦中漢唐古地也故唐以
前法帖居多人習見之參之以是豈寶藏之良玉溲
暑之冰甌不將使人一快觀耶因誌之以見刻者之

意

少陵石刻

國初巡憲宋公荔裳集蘭榻淳化帖晉唐以來名書
我為鈞勒寫杜工部秦州雜詩二十章鐫之於石置
齋中有摹榻者稱為二絕其後道署奉裁石刻不
知散軼何處人多惜之

直隸秦州新志卷之十二雜記下終

直隸秦州新志卷之末

補遺

新書何以有補遺非忽而遺之亦非佚於削刷氏而續以補之也其故有二焉一則初編時有所疑謂曠置弗錄旣而於心歉然或見諸他書弗忍棄也一則序而次之或稍弗類不欲以相間故別置一類以處之若附焉者未始非遺所以有補也若事之出於初編之後者固然矣有此補則遂無遺乎未敢知也書則汗牛矣識則矚豹矣窮蒐正史

稗野猶多未敢知也第目所及見則必補補而猶有遺亦可以稍解於挂漏乎就其中請舉數端以見例如沿革初或畧此著其詳也齊書之論是也如武備或戰非此地而命此地官用此郡兵也如災祥若漢水之不止此地而清水之又有縣名也存疑也如名宦於史無考而志有之或官不專此而功有足多者所必補也他或一言可採或一長足傳亦所不遺也嚴蘇氏之類是也藝文之第類而遂不類分焉均此志也作補遺

沿革補

周

秦穆公都雍地方三百里攻取西戎辟地千里分國十四隴西北地是也

秦昭王時義渠戎王與宣太后亂太后詐而殺戎王於甘泉遂起兵伐滅義渠於是有隴西北地上郡築長城

漢

高帝二年六月引水灌廢邱廢邱降雍州定八十餘

縣置河上渭南中地隴西上郡

更始二年使中郎將梁統安集涼州

安集非置
爲所有也

東漢安帝時涼州叛羌爲害大甚涼州諸郡寄治馮
翊扶風界

宋

文帝元嘉六年九月戊午於秦州置隴西宋康二郡

時秦涼二州俱治南鄭
則其所置郡亦僑立耳

齊

蕭子顯州郡志云晉泰元十四年雍州刺史朱序始

督秦州則孝武所置也寄治襄陽未有刺史安帝隆安二年郭銓始爲梁南秦州刺史寄治漢中元興元年以苻堅子宏爲北秦州刺史自此荊州都督常督秦州梁州常帶南秦州義熙三年以氐王楊盛爲北秦州刺史十四年置東秦州劉義真領之郭恭爲梁州尹雅爲秦州刺史宋文帝爲荊州都督督秦州又進督北秦州州名雜出省置不見永明郡國志秦州治漢中南鄭不曰南比元嘉計借亦云秦州而荊州都督常督二秦梁南秦一刺史是則志所載秦州爲

南秦氏爲北秦

按北秦屬氏是矣其但云秦州者當是寄治襄陽之秦故荆州都督督之

若南秦本寄南鄭與梁州同一刺史觀文可見所以置東秦之後郭恭但爲梁州刺史不帶言南秦矣惟是東秦置於何地不可考於是後亦不再見豈暫移於漢中左右而不久仍并於南秦歟其後又有西秦想亦不過上却仇池之別然不可考矣夫子顯去晉未遠尚曰省置不見又以不曰南北爲憾况後之人哉今取其言有關沿革故錄之

西魏

後廢帝三年宇文泰改置州郡及縣改東秦爲隴州

南秦爲成州北秦爲夏州

五代

梁初天下別爲十一南有吳浙荆湖閩漢西有岐蜀
北有燕晉後唐破蜀惟得秦鳳階成四州劉氏之初
秦鳳階成復入於蜀周世宗乃復取秦鳳階成

宋

理宗景定二年蒙古以汪良臣同簽筆昌路便宜都
統帥

度宗咸淳四年蒙古以鳳州隸興元路德興府
元

世祖至元元年七月癸未改新鳳州爲徽州

至元十一年四月分陝西隴右諸州置提刑按察司

治鞏昌

二十一年鞏昌總帥汪惟正乞仍於秦鞏州置便宜都總帥府總帥之下總管府令其兼之詔從之

二十四年以鞏昌改隸京兆提刑按察司

二十五年以鞏昌總帥府事繁改爲宣慰使司

三十年罷徽州錄事司

上年七月罷徽州路錄事司當是江南之徽州此不言路

而司亦罷是
新政之徽州

明

洪武中置秦州衛屬陝西行都司統於內右軍都督府

工部局州表

卷之二

五

食貨 補

漢

武帝元狩四年冬有司言關東貧民徙隴西北地西河上郡會稽凡七十二萬五千口縣官衣食振業用度不足請收銀錫造白金及皮幣以足用初筭緡錢

東漢

明帝永平元年秋七月賜隴右戍卒錢人三萬

安帝元初二年春正月詔票三輔及并涼六郡流冗貧人

順帝永建三年春正月甲午賜漢陽地陷裂傷者
年七歲以上錢人二千一家被害郡縣爲收斂夏四
月癸卯遣光祿大夫案行漢湯稟貸貧人

宋

武帝永初三年秦隄汎戶悉南入梁州詔送綜綱

匹荆隄州運米委州刺史隨宜賦給

按劉宋時梁州
卽漢中又分

爲秦蓋寄治也今云流入梁州
則秦民固有沾其惠者故錄之

元魏

文成帝太安五年秦州旱詔開倉粟以賑之有流徙

者論還桑梓欲市糴他界爲關傍郡通其交易

唐

開元後置使甚衆每使各給雜錢宰相楊國忠身兼數官堂封外月給錢百萬隴右節度使哥舒翰兼使所給亦不下百萬

宋

太宗初張平爲右班殿直兼市木秦隴計水陸之費以春秋二時聯巨筏自渭達河歷砥柱以集於京師期歲之間良材山積

大中祥符間，廝羅立遵等至秦州獻馬五百八十二匹，詔賜噐幣總萬二千計以答之。先是所賜凡中金七千兩，其後又令秦州歲賜奉錢

元

至元二十三年正月罷鞏昌二十四城拘權，所以其事入有司。

二十五年十一月鞏昌路荐饑，免田租之半，仍以鈔三千錠賑其貧者。

至治二年四月賑徽州饑。

武備補

周

貞王八年秦厲公滅大荔戎趙滅北戎韓魏共滅伊洛陰戎其遺脫者皆逃走西踰沂隴

漢

高帝十二年七月發上郡北地隴西車騎爲皇太子衛軍霸上

高后時匈奴再入隴西攻城屠邑毆畧畜產其後復入隴西殺吏卒大寇盜

文帝十四年匈奴單于十四萬騎入寇侯騎至雍甘泉帝以中尉周舍等爲將軍軍長安而拜隆慮侯周竈爲隴西將軍偕北地上郡等將軍屬大將軍張相如大發車騎往擊之逐出塞卽還

宣帝神爵元年西羌反發隴西天水騎士詣金城

東漢

光武帝建武三年李憲自稱天子西州大將軍隗囂奉奏帝遣將擊破之

六年秋遣前將軍李通率二將軍與公孫述將戰於

西城破之

七年八月隗囂寇安定馮異祭遵擊却之

十二年十二月隴西參狼羌寇武都隴西太守馬援
討降之

中元元年參狼羌寇武都敗郡兵隴西太守劉盱遣

軍救武都

以上三條戰非此地然
亂由此地平亦此地也

二年秋九月燒當羌寇隴西敗郡兵於允街

明帝永平元年七月捕虜將軍馬武等破燒當羌

章帝章和元年護羌校尉傅育發隴西等郡兵自將

漢陽金城五千人擊叛羌逃吾敗績死之

安帝元初元年號多羌反五官掾程信擊破之號多
退走還斷隴道

獻帝建安十七年韓遂據涼州明年冬曹操遣偏將
擊涼州十九年韓遂逃於羌中病死

晉

武帝咸寧五年春正月虜帥樹機能攻陷涼州乙丑
使討虜護軍武威太守馬隆擊之

成帝咸和八年石虎攻長安徙雍秦州華戎十餘萬

戶於關東

穆帝永和五年石虎敕雍州刺史張茂送故東宮謫卒高力等萬餘人戍涼州茂皆奪其馬令步推鹿車致糧戍所高力督定陽梁犢自稱晉征東大將軍率衆攻陷下辯秦雍間城戍無不摧陷

孝武帝太元間姚萇遣其弟碩德伐毛興於上邽會興死苻登代領其衆萇急召碩德東還萇遣其將軍王破虜畧地秦州苻登將楊定及破虜戰於清水之格奴坂大敗之

宋

文帝元嘉七年四月夏赫連定爲魏拓跋燾所破奔上邽十一月西秦乞伏茂萇聞定敗將家戶東征欲移居上邽八年正月至南安定率衆禦之執茂萇以

歸

茂萇卽慕末也

元嘉九年有司馬飛龍者自稱晉之宗室於晉末走仇池遂自仇池入綿竹率衆爲亂益州刺史劉道濟遣軍擊斬之

十一年春正月亡命馬大元羣黨數百人寇秦梁州

郡討平之

夏四月梁秦二州刺史蕭思話破氐楊難當

十八年十一月氐楊難當又寇漢川明年五月庚寅
梁秦二州刺史劉道真龍驤將軍裴方明等共討破
之仇池平

齊

武帝永明十一年北地人支酉聚數千人於長安城
北西山起義秦州人王度人起義應酉秦雍間七州
民皆響應衆至十萬明年爲魏將楊大眼等所滅

元魏

太平真君七年五月安豐公閻根率騎詣上邽與封
敕文討梁會

延和二年五月魏發秦兵築城於長安

西魏大統九年廣募關隴豪右以增軍旅

是時秦州濁水羌反州軍討平之

隋

開皇十六年黨項羌寇會州詔發隴西兵以討之

大業六年朱崖人王萬昌舉兵作亂詔遣隴西太守

韓洪討平之

唐

貞觀二十二年邛眉雅三州獠皆反發隴西峽內兵二萬擊定之

萬歲通天元年契丹入寇詔許欽寂爲隴山軍副使以禦之

聖歷元年突厥默啜剽隴右牧馬萬匹去

開元二年十月隴右防禦大使薛訥及吐蕃戰於武堵敗之

開元五年七月隴右節度使郭知運及吐蕃戰敗之
十三年正月葬隴右戰亡者

十五年正月隴右節度使王君奭及吐蕃戰敗之

十六年七月隴右節度使張志亮克吐蕃大莫門城

二十七年八月吐蕃寇邊隴右節度使蕭昊敗之

天寶元年十二月隴右節度使皇甫惟明及吐蕃戰

於青海敗之

天寶八年六月隴右節度使哥舒翰及吐蕃戰敗之

十二年三月隴右節度使哥舒翰敗吐蕃復河源九

備

上元元年六月鳳翔節度使崔光遠及羌渾黨項戰於涇隴敗之

廣德元年七月吐蕃陷隴右諸州

大歷十年十月昭義軍節度使李承昭及田承嗣戰

於清水敗之

存疑

景福元年六月隴右節度使李茂貞陷鳳州

天祐三年楊崇本會鳳翔涇原鄜延秦隴兵以討朱全忠不克

唐初兵之戍邊者六曰軍小曰守捉曰城曰鎮而總之者曰道曰隴右道統軍十守捉十五城三十二鎮三十八

儀鳳中以太僕少卿李思文檢校隴右諸牧監使牧監有始自是始

開元中以金帛市馬於河東朔方隴右牧之天寶末隴右群牧都使奏馬三十二萬五千七百其後吐蕃陷隴右苑牧畜馬皆沒矣

元和中伐蔡命中使以絹二萬市馬河曲其始置四

十八監地據隴右金界平涼天水員廣千里絲京度隴置八坊爲會計都領其間善水草廩田皆隸之後監牧使與坊皆廢故地存者一歸閑廐旋以給貧民及軍吏間又賜佛寺道館至是閑廐使張茂宗舉故事盡收岐陽坊地民失業者甚衆

初隴右節度兵入屯秦州尋從岐州及吐蕃陷隴右德宗置行秦州以刺史兼隴右經畧使治普潤咸通五年秦州隸天雄軍節度

五代

晉開運二年正月契丹陷秦州壬子馬全節及契丹

戰於榆林兩軍皆潰三月庚戌馬全節克秦州

前於沿革

志已辯之矣又是年北面招討使杜重威亦引兵攻秦州下之則未知孰爲此秦州也姑錄以俟考

周顯德二年伐蜀董遵誨擒蜀招討使王鸞以獻克

秦鳳二州

宋

建隆四年分命使臣往關西道令調發鄉兵赴慶州

乾德二年伐蜀蜀刺史藍思紹退保西縣

乾德中伐江南李繼隆領雄武卒三百戍邵州

太宗時李順亂西蜀秦隴賊趙包聚徒數千將趨劍閣以附之陝西轉運使鄭文寶移書蜀部分兵討襲獲其渠魁餘黨殲焉

雍熙端拱間陝西市馬則秦渭等七州鎮戎保安軍制勝關浩疊府自趙德明據有河南其牧市惟麟府涇原儀渭秦階環州岢嵐火山保安保德軍其後置場則又止環慶延渭原秦階文州鎮戎軍而已

大中祥符七年知秦州張佶置大落門新砦先是佶欲近渭置采木場蕃族聞之卽徙帳去佶不能遂撫

之戎人輒悔因鄉導鈔劫佶深入掩擊悉敗走至是
求和佶不許

八月伏羌砦廝雞波與宗哥族李磨論聚爲文法知
秦州曹瑋領兵趣之悉潰散夷其城帳

欽宗靖康元年金人入犯种師道督秦鳳兵入援

高宗建炎四年二月張浚自秦州引兵入援命關師
古等聚兵於大潭以固蜀口兀术自六合趨陝西

九月命秦鳳將關師古領兵赴行在十一月秦鳳副
總管吳玠收兵保大散關東和尚原

紹興二年金兵柵魚龍川口楊政率兵劫破之

五年二月吳璘楊政攻拔秦州執僞齊守胡宣

十二年金徒單合喜以兵五百敗宋兵二千於秦州
金深入沔州王大才兵累敗遂棄皂郊

吳政屯鳳州金人自白環堡突入黑谷遂入鳳州

夏人復攻金人遣百騎入鳳州邊守將求援兵

青唐族酋迎唃廝囉縣木征居洮州秦州以其近邊
逐之乃還河州

北軍自鳳州入東軍不能禦遂擣河池

隆興二年金人侵岷州吳璘提兵至祁山金人退

附

以後事出金史多稱宋人輒隨便用金之年號

太定二年宋將吳璘等以軍數十萬人據秦隴總管顏蓋門都擊之宋人保據德順都監合喜領軍四萬來赴遂復德順州

撒葛祝等破宋兵盡下諸砦及仙人關

大定二年都統璋副統習尼列邀擊宋經畧使荆皋言上八節至甘谷城殺數千人習尤列擒宋將朱永下將校十二人宋張安撫守德順亦棄城迅速魯

改邀擊之所殺過半擒將校十餘人遂復德順州宋
之守秦州者亦自退於是秦河鎮戎德順等州府盡
入於金

大定初都監神土懣率秦州兵討契丹

可婁室與宗翰伐宋耶律恕隸仙人關

夾谷猛安攻和尚原出仙人關宋兵據險猛安雖訛
只突戰不克謝奴選麾下五十人戰克之與吳玠相
拒烏里雅行陣不整吳玠乘之謝奴領兵逆戰遂大
破敵

泰和六年金通遠節度完顏承裕與秦州防禦使完顏麟屯成紀界宋吳曦兵五萬由保岔姑蘇等各襲秦州承裕璘以騎兵千餘人擊走之追奔四十里凡六戰宋兵大敗斬首四千餘級宋吳曦使其將馮興楊雄李珪以步騎八千人赤谷承裕璘及河州防禦使蒲察秉鉉逆擊破之宋步兵保西山騎兵走赤谷承裕遣步將唐括按答海率騎二百馳擊宋步兵甲士蒙括挺身先入乘之宋步兵大潰追奔至皂郊城斬二千餘級猛安把添奴追宋騎兵殺千餘人斬楊

雄李珪於陣馮興僅以身免是年通遠軍節度使承裕秦州防禦使完顏璘屯成紀界

貞祐二年正月宋人攻秦州統軍使石抹仲溫擊却之

貞祐三年四月以秦州防禦使女奚烈古里間行元帥府於平涼

興定元年金完顏白撒伐宋出鞏州益井遇宋兵於皂郊堡敗之又遇宋兵於天水軍掩擊宋兵大潰二年四月復敗宋兵至雞公山遂拔西和州毀其諸隘

營屯遣合扎都統完顏習涅阿不率軍趣成州宋率
羅叅政統制李大亨焚廬舍棄城遁留千餘人城守
督兵赴之遂克焉獲糧七萬斛錢數千萬河池縣守
將楊九鼎亦焚縣舍走保清野原統制高千搃黑谷
關甚固遣兵襲之千遁去獲糧二萬斛器械稱是因
夷具險而還

正隆末大舉伐宋宋人入秦隴

元

世祖初安撫使廉希憲命汪繼良將秦鞏諸軍進六

盤太答兒率鞏昌諸軍攻宋入蜀

憲宗八年薛塔刺海從世祖攻破重慶馬湖天水

明

洪武五年秋七月湯和及元兵戰於斷頭山敗績

十二年二月李文忠督理河岷臨鞏軍事

十三年詔陝西衛軍以三分之一屯田

二十五年二月靖寧侯葉昇等練兵於臨鞏

永樂二十二年將北征命鞏昌等各衛兵期三月會

北京及宣府

成化八年孛羅忽亂加思蘭屢入安邊營花馬池犯固原寧夏平涼臨鞏環慶南至通渭

九年九月滿都魯及孛羅忽亂加思蘭留妻子老弱於紅鹽池引兵抵秦州總制王越乘虛搗其巢破之虜自是遠徙北去不敢復居河套

成化十二年兵部侍郎滕昭英國公張懋條上邊備請調秦州等戍安定會寧

崇禎五年四月總兵官曹文詔楊嘉謨連破賊於隴安靜寧賊奔水落城平涼莊浪饑民附之勢復熾

十六年李自成攻破潼關陳勇奔秦州

新刊
知
聲
PDG

災祥補

漢

高后八年夏漢水溢流萬餘家

獻帝建安二年九月漢水流害民人

建安三十四年八月漢水溢流害民人

晉

苻堅興寧三年秦州地震裂水泉湧出金象生毛

齊

高帝建元四年青龍見清水縣平泉湖中

縣名未的

元魏

高宗興安四年十二月雍秦饑旱

宋

太平興國七年北陽縣蝻虫生有鳥食之盡

至道三年九月丙戌秦晉諸州地晝夜十二震

天聖二年五月鳳州甘露降

紹興元年夏鳳州涪雨傷麥

紹興二年鳳州無麥

紹興三十年春西和鳳州旱

淳熙十三年秋鳳州淋雨敗稼

淳熙十六年冬西和鳳州荐饑

紹熙二年西和鳳州亡麥

元

延祐四年七月成紀縣山墮土石潰徙壞田稼廬舍

壓死居民

泰定元年十月乙卯秦州成紀縣趙思直妻張氏一

產三子

元統三年二月成紀縣山墮水湧溺死者無筭

明

崇禎十六年秦州有二山相距甚遠民居其間者數
百萬家一日地震兩山合居民并入其中

官師補

秦

隴西太守

李

崇

見唐書宗室世系表

漢

隴右護羌校尉

見西羌傳

竇林

郭襄

吳棠

張紆

鄧訓

聶尚

賈友

史克

吳祉

周 顛

侯 霸

段 福

涼州刺史

宗 漢

漢陽太守

范

津

字文淵
南陽人

孫

耽

字立志
東漢時

蓋

進

魏

護羌校尉

蘇 則

溫 恢

涼州刺史

鄒岐

晉

秦州刺史

李繼宗

王泰

元魏

秦州都統

薛安都

兼總雍州

秦州刺史

拓跋焘

卽元焘見雜記

馮熙

權超

夏侯道遷

漢陽太守

拓跋世遵

天水太守

杜祖悅

悅與馮熙初編官師志以其於史無考誤列小註中今詳雜記

秦州主簿

邊因

周

秦州總管

尉遲迥

隋

檢校秦州總管

李長雅

薛彥謙

隴西太守

韓洪

唐

隴西郡司馬

劉秩

正長長司馬

補遺

三

五代

鎮秦州

王景

知秦州

答居潤

秦州觀察判官

劉熙古

秦州押衙

吳崇輝

秦州刺史

楊景宗

知秦州

李繼隆

韋 亶

蔡 抗

田 兗

秦州司寇秦軍

王嗣宗

秦州司戶

徐 鉉

正素君少素君

系又三

三

天水郡守

程俊

兩當縣尉

趙鼎

金

秦州防禦使

女奚列古里間

元

成紀縣知縣 教諭

楊宗

梁公弼

徽州知州

金堅

翟茂

劉濟

楊茂

盛廣

侯禔

息清

許釗

白松

徽州學正

王崢

兩當縣知縣

史忠

韓時

高騰

孫逢吉

兩當縣主簿

廖森

兩當縣訓導

蔣慶

選舉補

附

何

縉字廷賢秦州拔貢弘治中任山西
忻州同知正德初改山東膠州

名宦補

漢

皇甫規字威明安定朝那人永和末西羌大寇馬賢擊之不能克規審其必敗尋而賢果爲羌所沒郡將知規有兵畧命爲功曹與羌戰却之舉規上計掾後羌衆大合攻燒隴西規上疏求自効不用延熹四年秋叛羌零吾等與先零別種寇鈔關中護羌校尉段熲坐徵後諸羌陸梁覆沒營塢規復上疏三公舉規爲中郎將持節監關西兵討零吾等破之先零諸種

五帝三王
卷之六
三
慕規威信相勸降者十餘萬明年規因發其騎共討隴右東羌乞降涼州復通先是安人太守孫雋受取狼籍屬國都尉李翕督軍御史張宗多殺降羌涼州刺史郭闔漢陽太守趙熹並老弱不堪任職規到州界悉條奏其罪或免或誅羌人聞之翕然反喜顧規惡絕宦官不與交通於是中外並怨遂共誣規貨賂羣羌令其交降終以餘寇不絕論輸左校曾赦歸家後復拜度遼將軍弘農太守封壽城亭侯不受再轉護羌校尉卒所著賦銘書檄牋記等二十七篇

魏

徐邈字景山燕國蘇人也明帝以涼州絕遠南接蜀境以邈爲涼州刺史使持節領護羌校尉至值諸葛亮出祁山隴右三郡應之邈遣參軍及金城太守等擊南安破之河右少雨常苦乏穀邈上修武威酒泉鹽池以收虜穀又廣開水田募貧民佃之家家豐足倉庫盈溢乃支度州界軍用之餘以市金帛犬馬通供中國之費以漸收歛民間私杖藏之府庫然後卒以仁義立學明訓禁厚葬斷淫祀進善黜惡風化大

行百姓歸心焉西域流通荒戎入貢皆邈助也邈與羌胡從事不問小過若犯大罪先告部帥使知應死者乃斬以徇是以信服畏威賞賜皆散與將士無入家者妻子衣食不充天子聞而嘉之隨時供給其家彈邪繩枉州界肅清

齊

王元邈字彥遠太原祁人昇明中爲秦州刺史齊建元初李烏奴作亂襲州城元邈率兵破之高帝聞之曰元邈果不負吾

梁

裴邃字淵明河東聞喜人舉秀才對策高第累遷西戎校尉北梁秦二州刺史復開創屯田數千頃倉廩盈實省息邊運民吏獲安乃相率餉絹千餘匹邃從容曰汝等不應爾吾又不可逆納其絹二匹而已

元魏

崔衡字伯玉清河人少以孝行著稱擢爲內秘書中散遷內都坐合善折獄高祖嘉之太和二年襲爵武陵公除秦州刺史徙爵齊郡公先是河東年饑劫盜

大起衡至修龔遂之法勸課農桑周年之間寇盜止
息十二年卒謚曰惠公衡學崔浩書頗亦類焉天安
初班下詔命及御所覽書多其迹也衡舉李冲程駿
李元愷等終爲名世器世以是稱之

北齊

韓軌字伯年太安人少有志操性深沉喜怒不形於
色神武鎮晉州引爲鎮城都督及起兵於信督軌贊
成大業從破尔朱兆於赤碭嶺再遷秦州刺史甚得
邊和神武巡秦州欲以軌還仍賜城人戶別絹布二

人田昭等七千戶皆辭不受唯乞留乾神武嘉
歟乃留焉

唐

蕭瑀字時文後梁明帝子也愛經術善屬文嘗以劉
孝標辯命論詭悖不經乃著論非之以爲人稟天地
而生而謂之命至吉凶禍福則繫諸人今一於命非
先王所以教人者通儒多稱嘆之隋煬時出爲河池
郡守部有鈔賊萬人吏不能制瑀募勇士擊降之悉
捐貲畜賜有功又擊走薛舉衆數萬高祖入京師

之挈郡自歸授光祿大夫封宋國公

瑀爲郡在隋時而今所錄者唐

書也故從省

志繫之唐云

王及善邯鄲人以父死事襲邢國公爵召爲衛尉卿
垂拱中山東饑詔爲巡撫賑給使拜春官尚書出爲
秦州都督復拜內史來俊臣繫獄當死武后欲不誅
及善曰俊臣凶狡不道引亡命汙戮良善天下疾之
不剗絕元惡且搖亂胎禍憂未旣也后納之廬陵王
之還密贊其謀旣爲皇太子又請出外朝以安群臣
及善不甚文而清正自將臨事不可奪有大臣節

鄧景山曹州人本以文吏進累至監察御史爲隴西
太守副豐王珙節度隴右至德初拜青齊節度使徙
淮南時王思禮在太原儲膺羸衍管崇嗣代之政弛
不治爲下盜費畧盡以景山爲太原尹封南陽郡公
至則振覈紀綱檢覆干隱衆大懼而景山清約子弟
饌不過草具用器止烏漆待上賓惟豚魚而已

宋

王拱辰字君貺咸平人元名拱壽年十九舉進士第
一仁宗賜以今名通叛懷州入直集賢院歷鹽鐵判

官爲翰林學士出知鄭州徙澶瀛并三州復拜三司使聘契丹以端明殿學士知永興軍歷泰定三州河南大名府積官至吏部尚書出爲應天府再判大名改武安軍節度使三路籍民爲保甲拱辰抗言其害曰非此困其財力奪其農時是以法驅之使陷於罪罟也浸淫爲大盜其兆已見縱未能盡罷願財損下戶以紓之上章不已於是第五等戶得免徙節彰德加檢校太師薨按拱辰未爲秦官前於名宦張方平傳已辯之矣省志載其劄劄州威恩並用羌人信服域別有據耶茲特詳錄其平生所歷外任如履歷焉以俟博雅

余靖字安道曲江人起家爲贛縣尉知新建縣擢集賢校理范仲淹貶饒州靖疏論之落職監筠州酒稅徙監秦州稅知英州復爲校理靖在職數言事多見納用三使契丹習外國語嘗爲番語詩御史劾之出知吉州遷衛尉卿知虔州起知潭州改桂州又徙青州後安撫廣西知廣州官至工部尚書代歸卒靖嘗憂神人告以所終官而死秦亭故靖嘗畏西行及卒則江寧府秦淮亭也

省志載其知秦州教條分明以治最聞前於張方平傳並註之

矣詳其官以俟考也

魏祐字伯受長興人以直學士知秦州或請調熙河
弓箭士徙邊以省更戍祐謂人情懷土重遷巧以二
年爲更發之期滿歲樂業而願留者乃聽且請擇熙
秦富民分丁授地蠲役借糧以勸耕植益廣秦之東
西川建城壁嚴保障以控熙河涇原皆從之

何常字德固京兆人以顯謨閣待制知秦州謀告夏
人多築堡柵朝議出兵牽制常言羌人生長射獵今
困於版築遠所長用所短可以拱手待其弊無煩有
爲也從之鎮秦六載

李周字純之馮翊人登進士第調長安尉歲饑官爲粥以食餓者民坩集不可禁縣以屬周周設棹極間老少男女無一亂者都巡檢趙瑜詰盜南山諸尉皆屬焉瑜悍急多行無禮獨於周不敢肆轉洪洞令民有世絕而官錄其產者其族晚得遺券周取以還之郡吏咎周周曰利民所以利國也縣之南有澗支流溢入歲賦蒲棗調徙過之周始築新隄民不告病改知雲安縣蠲鹽井之征且百萬通判施州州介群獠不習服牛之利爲辟田數千畝選謫戍知田者市牛

使耕軍食賴以足司馬光將薦爲御史欲使來見周
不往神宗詔近臣舉士孫固以周聞神宗召對且以
爲御史執政請試以事除提點京西刑獄竟以直道
罷哲宗立召爲職方郎中除陝西轉運使歷知邠州
鳳翔府徙河中府陝州改集賢殿修撰卒周自爲小
官沉晦自匿未嘗私謁執政有公事公詣中書白之
薛向使三司欲辟爲屬及相見卒不敢言退而歎曰
若人未易屈也以是不偶於世觀此傳則誠循吏也然未嘗官於秦不遺
陝西轉運耳首志載其字純之馮翊人嘉祐五年
知河池公正嚴毅沉晦自匿云云豈洪洞之訛耶

王令圖太原人至和中以殿中丞爲河池令時值開河會議河去縣四十餘里部屬陝西移文令圖通幹其事自秋七月至八月路已通工告訖下詔旌之狄紳元祐間知隴城寨綽有聲績

趙鼎聞喜人徽宗時爲兩當尉自筮仕時立志遠大

後爲中興賢相

考本傳字元鎮登崇寧五年進士累官爲洛陽令令曰累則尉可知

陳佃簡州人紹興二十二年自朝奉大夫知河池縣不爲煩苛有古循良風常盛暑遣囚歸各感其息皆如期至

董彥威紹興中河池尉愷悌愛民一日盜至邑人大

驚彥威不恐懾徐遣兵盡捕之

以上諸人不見史傳今依省志錄之若趙

忠簡則夫人而知之者故不贅

明

董盡倫字明吾合州人萬歷中舉於鄉除清水知縣
調安定咸有惠政秩滿安定人詣闕奏留詔加鞏昌
同知仍視縣事久之以同知理甘州軍餉解職歸天
啓初奢崇明反率衆薄城盡倫偕知州固守賊遣使
來說降盡倫大怒拔刀抉其使之目睛生啖之屢出

奇兵挫賊鋒城遂獲全復率衆授銅梁有功當事以

其能軍檄擣重慶因戰死贈光祿少卿

此亦葉忠節之例也縣宜

祀舊志弗詳故援史補之

五 赤 子 弟 三 八

三 八 一 二 三

三 八

資 子 弟 學

PDG

列女補

晉

杜有道妻嚴氏字憲京兆人也貞淑有識量年十三適於杜氏十八而發居子植女韡並孤貌憲雖少誓不改節撫育二子教以禮度植遂顯名於時韡亦有淑德傳立求爲繼室時立與何晏鄧颺不穆時人莫共婚而憲竟許之或曰何鄧執權必爲立害亦由排山壓卵以湯沃雪耳憲曰晏等驕侈必當自敗司馬太傅獸睡耳吾恐卵雪行自有在遂與立爲婚晏等

尋亦爲宣帝所誅植後爲南安太守植從兄預爲秦州刺史被誣徵還憲與預書戒之曰諺云忍辱至三公卿今可謂辱矣能忍之公是卿坐預後果爲儀同三司立前妻子咸年六歲嘗隨其繼母省憲謂咸曰汝千里駒也必當遠至咸後亦有名於海內其知人之鑒如此

竇滔妻蘇氏始平人也名蕙字若蘭善屬文滔苻堅時爲秦州刺史被徙流沙蘇氏思之織錦爲迴文旋圖詩以贈滔宛轉循環以讀之詞甚悽惋凡八百四

十字

唐

東光縣主太宗子紀王慎女也始八歲聞慎有疾不
食父哀之給云已愈主察顏色未平終不肯御內外
稱之長適太子司議郎裴仲將時妃主多恃貴以奢
謙相矜主獨儉素及王得罪薨於道主號慟嘔血數
升免喪絕膏沐者二十年始諸王自垂拱後被害者
皆蒙掩之神龍初詔復官爵陪葬主聞感慟卒中宗
為發哀下詔褒揚

李慎曾為
秦州都督

金

溫特罕氏夫完顏忙哥五朶山宣差提控回里不之子也系出蕭王忙哥叔父益都節度秦州爲元兵所攻病不能軍忙哥爲提控獨當一面兵退而益都死忙哥以守城功世襲謀克收充奉御及崔立之變忙哥義不受辱與其妻訣妻曰君能爲國家死我不能爲君死乎一婢曰主死婢將安歸是日夫婦以一繩同縊婢從之

藝文

漢書趙克國等傳贊

班固

秦漢已來山東出相山西出將秦時將軍白起郿人
王翦潁陽人漢興郁郅王圖甘延壽義渠公孫賀傅
介子成紀李廣李蔡杜陵蘇建蘇武上邽上官傑趙
克國襄武廉褒狄道辛武賢慶忌皆以勇武顯聞蘇
辛父子著節此其可稱列者也其餘不可勝數何則
山西天水隴西安定北地處勢迫近羌胡民俗修習
戰備高上勇力鞍馬騎射故秦詩曰王于興師修我
甲兵與子偕行其風聲氣俗自古而然今之歌謠懔

慨風流猶存耳

漢書藝文志有燕代謳鳳門雲中
隴西歌詩九篇惜只有目而無詞

伏羲畫卦臺記

普 奕

畫卦臺者卽古庖犧氏畫卦臺也在秦州成紀縣北
三十里其川三陽其地突兀若覆簣而籠岡焉諺謂
蝸牛堡高不倍尋廣袤四隅滑水洄旋朝暉夕陰變
態靡時隴右爲甲昔羲皇成紀人也河出圖以是則
之仰觀俯察近取諸身遠取諸物定竒偶而畫爲文
以代結繩之政爲萬古之標準洎都陳始作民君師
設官分職以開平治其高至乎無極太極之妙而其

實不離乎日用之間其幽探乎陰陽造化之蹟而其
實不離乎仁義禮智剛柔善惡之際其體用之一源
微顯之無間性此理而安焉者聖也復此理而執焉
者賢也厥後聖賢繼作其所以相傳之說豈有一言
以易我哉其傳此何與曰仁也仁人心也率性立誠
知天推而宰萬物傳道而誨斯民者也及其至也與
天地合德鬼神同體悠久無疆變化莫測易曰知幾
其神乎神之在天若水之在地譬若掘井無往而非
水也况聖在天之靈克享萬世無窮之祀者也聖朝

奄有天下制詔曰聖帝明王忠臣烈士載在祀典者有司以時致祭廟宇損壞官爲修理作興之餘釋老之祀者已復其初獨此地委於榛蕪見者莫不太息於是民人履其遺址鳩工掄材廟堂榱桷坳堊丹雘次第一新勒之琬琰不有好古聞賢之舊孰能若是乎縣尉韓彧踐古人之跡頌其休烈雖存閭閻之祭獨闕有國之禋遂申明都部符文於郡縣春秋常例廟祀外故跡臺所每歲三九月給錢分官致祭至止甲申秦州同知周贊承直下車旣剔蠹出姦民俗安

靜一日謁廟周覽方隅之盛墾田迥闢黍稷芄芄詢
民之耆舊者咸曰乃古之贍廟地也步其田得一頃
四十五畝每畝收租麩麥一斗以供二祭視舊益新
都總帥汪公命可歷紀其實刻石於廟前庶不至於
湮沒本縣尹何大用承直親董其事其開廸涵育之
大德斯無負矣至於考方誌記聖德亦守土者所當
謹都帥求記旣不容辭攬筆直述以叙其方今之盛
焉爾至正丁亥五月甲子

重建畫卦臺伏羲廟記

康海

秦州故有伏羲廟而畫卦臺在廟西三十里巋然中
踞於岡巒之間予昔有事過秦嘗北望而竒之輿者
曰此伏羲畫卦臺也人文之秘肇啟於茲今日不知
幾萬千載而靈秀環衛若修垣愛護焉殆非偶然者
也巡按御史方君行部至秦登臺瞻望慨然興懷於
是進郡吏與士大夫耆舊謀曰古聖之蹟散在天下
其有表章而此又人文之始顧徒寄聞於樵夫牧豎
之口寧無遺拊髀之恨於將來稽古之士哉宜建祠
於此以祀伏羲匪直追報其肇啟人文之德而且因

以表章聖蹟愜千萬世之後觀矣遂鳩工掄材擇以
今歲二月二十日始事閏六月二十八日工用告成
財出公帑民不知費郡吏與士大夫耆舊懽忻鼓舞
咸思悠長於是介其貢士劉如式以狀請予爲記紀
其歲月劖之貞石爰符於志永惟世嘉然予又以歎
世之卑見之士慎小費而乏大猷原其心則實非以
省民也顧畏爲談禍爾學校之頽壞天下十九而是
行道用惻而士大夫視爲秦越曾不齒及予深以爲
將來之憂乃休休然爲奇論怪說以闕杜欲爲者之

志無已至於斲盡彼卽欲挽而揀之又烏可得也鄙
諺有曰食欲廢棄耒耜邦欲做貴處士自宋以來儒
者以迂僻不經之論媚惑後世俗儒誦而不釋其以
爲是是則所以貽萬世無窮之害者未必非其人啓
之也聖天子右文崇化漸將變其迂緒以復古人忘
言之舊矣後世有黜耳目之細敦根莖之大者未有
不自方君今日之事以感悟者也庸書以俟方君名
遠宜字伯時歙人而主承茲事者鞏昌府同知滑臺
李暹臨兆府同知中山王卿云嘉靖辛卯六月吉日

增修太昊廟記

白世卿

太昊伏羲氏之廟初荒落不治祀事亦鹵莽弗稱前
巡按御史馬君溥然馮君時雍許君翔鳳三人者先
後愷於朝以請大工以崇大典蓋皇皇乎此舉也未
幾適遂寧陳君講朔州盧君問之古歛方君遠宜各
以按至規畫攸同功至是而始成矣已而又繼以鳳
陽陳君世輔任邱郭君圻偕來迺惟一德一心圖惟
厥終蓋定經制錄廟祀者力馬功至是而大成矣粵
明年是爲嘉靖癸巳時御史劉君行部矣登顧之項

慨焉興懷且歎曰美哉至乎前人功也予何爲者邪
尋命爲龕卦臺之上衛其像也製蓋於殿宇之間蔽
其塵也繪河圖於蓋之中外象其則也建綽楔於門
之東西表其功也其諸葺缺而補敝增美以飾觀者
類多有之功至是而大備矣事旣竣乃屬余爲記余
惟太昊伏羲氏古元聖也其道之在天下萬世如日
月之在天江河之在地不可一日而無焉者世之人
暴容光而不知其本厭甘泉而不知其源終始吾聖
人道化中而不知其故無怪乎彼之落落也不有君

子夫誰與歸是故豐帝王之祠者存敦本之恩廣聖
賢之祀者立報功之義天理民彝自有不可泯沒者
諸君子於斯盡之矣余不敏夫何嘗哉謹書此以識
有功云劉君名希龍字汝言衛輝人邊備副使寶明
分守叅議劉從學皆有力於時者知州黃仕隆同
知余光宇實督其役於是乎併書嘉靖癸巳十月庚
午

重修西虎嘴名賢祠記

李 鉉

秦州天靖山西虎嘴一峯有李杜祠中豎松雪草書

石刻四舊名大雅堂前有空堂三楹下臨峻崖有方
亭四面皆虛全秦在望舊名選勝亭祠北又有別院
堂三楹祀漢諸葛武鄉侯宋韓魏公暨前明秦州牧
郭公像考故碑李杜祠建於明嘉靖中黃巖李柱史
而名字不傳松雪書則劉侍御所立而大雅堂未知
伊始也我

朝康熙初耿公繼先巡隴右重修選勝亭有記顧不詳
所由來中丞盧公詢捐葺李杜祠止留詩刻而無記
余竊疑之若別院堂乃天啟間郭牧子之琮巡撫甘

寧爲乃翁追建祠宇也今其像亦頽壞余方欲改而新之適秦父老諱諱爲余言

國初百姓初脫兵難而額賦無少減高公必大來刺州力請丈量累乃豁順治末城圯於震巡憲荔裳宋公州牧姜公或啟或翼百堵皆興而民居用寧是三公者皆爲秦禦大災捍大患吾儕小人父傳子述至今不忘者也盍祀諸余聞而瞿然曰嘻是宜祀爰更新易舊分祀漢唐宋諸名賢於故有之堂又特建三楹於別院東奉三公木主並易郭公將毀之像以主

並祀焉榜其門曰名賢祠於蒼松翠栢間雜以粉廊
紅榭與大雅堂選勝亭相映爲遊觀之娛是役也經
始於己未夏仲訖工於孟秋後之君子念余追溯莫
績民之不忘蠲潔明禋俾勿廢墜是則神人胥悅之
盛事也夫

南湖新建文昌宮記

費廷珍

秦州爲鍾毓文祖之區山川精氣上薄雲霄下蒸髦
俊人文宜甲天下而後先相望不無今昔之感者非
氣運使然始振興之未至也戊寅歲余奉

命來守是邦按其山川形勝如故而人文不振躊躇久之謀所以振興之者未得偶而南湖之隙見其地豁然開剪面轟魁垣垣之東山曰文臺西曰武臺蓋州治之吭脰也夫州治發跡於鳳凰山迤邐數十里狀如羅帶縈風波紋層疊志所稱兩翼翩然南旋若鳳者其融結於斯乎迺於蒞政之明年躬率多士察地脉之所注法天文以辨方建奎垣祀文帝其兩臺者翼然分峙經營既定庀材鳩工正殿三楹享殿如數蔽門以屏黜堊丹雘燦如也旁築僧寮香積各三間

予地二十畝以贍焚修既脩乃事孔曼且碩經始於
已卯端陽歌落於庚辰重九所需傭資物直悉捐俸
以畀之勸其事者紳衿李子又白陳子玉鼎連子遇
楊子遇春劉子愨楊子梓鄒子裕鄭子又蘭等咸輸
勞勩用底成功余觀而歎曰有是哉佳氣鬱葱卿雲
糾縵天文照耀地脉繁紆亦可謂振興之矣爾多士
瞻帝容凜帝訓孝友自勗陰隲靡虧本實行爲文章

上副

朝廷棧樸作人之化是卽高岡鳴鳳也鳳凰山之精氣

有不蔚爲人傑者歟是則余建宮之本意也爰記諸石以俟焉

築城南新堤記

費廷珍

乾隆戊寅秋予以令遷來視秦州事周閱城垣蓋東南已有傾圮者州之南北無郭出城南里許爲籍水自西而東水外又里許則土山橫亘中多谿谷每大雨卽羣壑澎湃挾籍水而北淹沒田畝以迄城垣也已進諸紳士而細詢之僉曰是其爲患二十年矣二十年前城西魯谷之水自北而南以入於籍籍水

清澗魯谷水雖小而奔渾勢力抵拒籍水雖引孳壑之漲而不能北侵自歲庚申魯谷驟漲西郊闔閭列肆商賈百貨之所聚在其兩岸大被患焉於是改水道從北而東籍水北侵無復拒之者歲浸日漸以至此也爲今之計惟於城南水北築堤爲防前牧劉公爲之倡迄無成功豈土性之固疎抑人力之未至耶予乃親往步故跡相形勢鳩工庀財出厚貲以募人夫朝暮頻出躬自督於畚鍤之間彌三載迄於今高厚堅緻疑用成矣堤外之田咸可藝矣更爲種樹其

上建緯楔以爲表識焉天古之君子蒞官之處必有以加惠於民物而垂蹟於後世顧此區區土功仍藉此州人士之力劬勞經理自以謀厥生而奠厥居予何有焉惟是三年來具金錢足廩餼矻矻督率在鄙衷亦有不能自己者後來君子或因是而更廣德心以大有造於此州人士固當記其始末以貽之若乃城垣之修爲工甚鉅當請諸上官而動公帑非有司所敢議及此又予之坐負州人而耿耿內愧者也

徽縣重修文廟記

雷正

歲辛巳余權守南安兼視分巡篆冬十月有成之役
取道於徽徽大令余同鄉李公兆錦也時公出未遇
見署在朱薨碧瓦掩映於蒼松翠栢間詢知文廟鼎
新肅衣冠踵謁何學博浩爲余道其詳曰廟自郊縣
劉公濟經始於明成化丁未之冬弘治改元秋乃落
成後之踵葺者碑誌具載第簡畧者多且百餘年後
頽圯已甚李公自戊寅下車來仰體

聖

天子崇儒重道之雅首向文教倡先捐修擇諸生才
幹者若梁生承業王生宏業等五人董其事廼鳩工

庀材於大成殿遵式更易椽瓦其棟宇戶牖臺級欄楯以及兩廡靡不除陋增華璀璨奪目戟門則徒端方向而表立四楹櫺星門則加高尋尺而曼臨泮池池舊乏橋旣斜且淺今規而正之濬而深之跨以梁梁闌梯秩秩外開渠三百餘步引鐘山泉以注之思樂之歌洵可味矣崇聖祠居鐘山之麓向也茂草荒坡樵牧並擾爾乃增修廓如築垣與廟墻相屬凡廟中籩豆登劔干戚鐘簋諸器亦咸整飭如新視前明劉公之功偉矣惟公政和故民力舒民力舒故事畢

上言少系元
卷之六
馬
舉更如 慶祝宮以肅

朝賀明倫堂以振風紀鳳山書院以課經業鳳岡吟社
以訓風雅宣靈王廟以祈霖澤民皆重地要區或創
建或重修公捐俸廉居多士庶感而爭輸四載取次
就理崢嶸相望而茲廟其尤著者因以記請余謂之
曰李公真不負守土任者其家廼余郢中巨族父子
昆弟以名進士孝廉出典郡邑所至胥著循績稱者
謂李氏有治譜焉此其明証也徽人士其自今蔚然
有起色歟因書以畀之俾鐫於麗牲之石

重建秦安學署記

諸爲霖

定制明倫堂後爲司鐸公廨凡學皆然獨吾邑僅存遺址巋然朽構露立於頽垣碎瓦中博士先生至輒僦民舍以居或僑寓於龍山書院非一朝矣余自壬申舉於鄉越二年甫試南宮蒙

息卽出宰正寧縣曾爲彼地興學焉又七年移令茲土

謁廟之餘顧瞻蹙額詢諸學博無如何也今年春未

庶務稍暇召諸生而謂之曰若曹儼一衿朔望與事

或執卷此堂中獨不念先生無棲止乎僉曰唯唯爰

爲之再三躄費擇強有九者董其役庀材鳩工尅期而舉擴基坎艮移向於西爲門庭堂室及厨廡凡若干間維厚維固亦復可容車騎先生入而樂焉羣弟子咸來謝曰微公之力不至此嗚呼令則何功余嘗謂訓士無方師也責待師無禮令也愆忝以書生作宰而坐赧堂隍顧令苜蓿寒糲依栖靡所忘吾素志耶况當右文之時

聖天子崇獎有加此都人士又非聞而不章者比邇巍巍鬱序草宅其後非令之羞歟故不辭因陋而爲之

6

并自記之蓋欲我多士知尊師之必予以安而師乃
克盡其心必予以可觀而人乃生其敬以庶幾無負
盛朝作人雅意而更有望於後之增葺者耳敢自多乎
哉

嘉陵江聞水聲寄深上八

唐 韋應物

鑿崖泄奔湍稱古神禹跡夜喧山門店獨宿不安席
水性自云靜石中本無聲如何兩相激雷轉空山驚
貽之道門舊物我了此情

嘉陵江

雍 陶

離思茫茫正值秋每因風景却生愁今宵難作刀州
夢月色江聲共一樓

夜宿嘉陵江

武元衡

悠悠風旆遶山川山驛空濛雨作烟路半嘉陵頭已

白蜀門西更上青天

題黃花驛

薛逢

孤戍迢迢蜀路長
烏鳴山館客思鄉
更看絕頂烟霞外
數樹巖花照夕陽

過鐵山

宋趙抃

暫留山驛又晨興
西望旌旄想舊朋
三院華簪曾對直
兩川兵印復交承
年光頭鬢華如雪
世態心情冷似冰
境上憑詩遂遠意
青泥寒曉入雲登

頃歲從戎南鄭往來南鳳
追憶舊遊友

陸游

苦戍蠶叢北，頻行鳳集南。
烽傳戎壘密，驛送客程貪。
春盡花猶折，雲低雨半含。
種畝多菽粟，藝水雜松楠。
婦汲惟陶器，民居半草菴。
風煙迷棧閣，雲霧起秋潭。
城郭秦風近，村墟蜀語叅。
快心逢曠野，刮目望浮嵐。
考古興時感，無詩每自慚。
嘉陵最堪憶，迎馬柳毵毵。

金蓮洞訪張三丰

明 胡濙

香車入幕下，無邊遍訪丰。
師感應處，萬載紅巖生玉。
蘊千年碧洞，結金蓮雲深。
喜見通明日，雨驟知逢黠。

淡天峭壁真光熬永劫赤心願覩白衣仙

過仙人關

楊一清

樹外蒼雲雲外山數間茅屋又無椽旁人指點雲深處此是仙人不老關

宿徽州

楊慎

灝氣橫空雨露天胡爲朝暮雨連連客中多少思鄉夢却被金聲破枕邊

宿北禪山寺

郭從道

日暮投蕭寺捫蘿叩竹扃片雲歸遠岫雙鷺落前汀

明月懸空碧墨雲
遙眼青平生林壑趣
對此覺惺惺

李杜祠

國棟

累朝李杜並齊名
俎豆文壇此合并
詩史詩仙千古壯
憂君憂國兩心明
相依巖武誰憐客
得志王璘豈弄兵
無限牢愁難對語
廟庭風雨泣三更

諸葛壘

國棟

故壘蕭蕭倚碧岑
儲胥并灶認遺蹤
三分手定羞功狗
六出勞心老臥龍
持久偏安真不解
事煩食少竟何庸
可憐北地偏無位
背裂青衣卒就封

喜鳳堂成東學中諸生

李兆錦

選勝築堂成可觀，
諱從餘事獨憑闌。
北牕風達羲皇

郡，西嶺雲依杜老壇。
詩客江行曾號虎，
羅伶倫山在

欲招鸞性耽佳句，
盟須訂長吏猶然儒素寒。

凱奏西征大捷年，
呦呦秋野鹿鳴天。
自多玉國士人

出奚少仙關兄弟傳，
香透木犀盃泛月光依金鴨筆。

凌煙風禽草樹曹劉壘，
不似泜江助謝玄。

直隸秦州新志卷之末終